



Ministar Kalamujić: Sudske takse građani od sada mogu kupiti u zgradi Općinskog suda u Sarajevu

Ministar finansija Kantona Sarajevo, dr. Afan Kalamujić, otvorio je 10. maja 2024. godine konferenciju za medije koja je organizovana povodom rješenja dugogodišnjeg problema za građane i građanke vezanog uz kupovinu sudskih taksi.

Građani Kantona Sarajevo, ali i Federacije Bosne i Hercegovine, od sada sudske takse mogu kupovati u zgradi Općinskog suda u Sarajevu, ali i u glavnoj BH Pošti u ulici Obala Kulina bana. Time se strankama olakšava i ubrzava korištenje sudskih usluga.

Problem je riješen zajedničkim naporom i angažmanom ministra Kalamujića, predsjednika Općinskog suda u Sarajevu Damira Batotića i vršioca dužnosti generalnog direktora JP BH Pošta Adisa Šehića.

Otvorenjem prodajnih mjesta za sudsku taksu u zgradi Općinskog suda u Sarajevu i glavnoj BH Pošti na ulici Obala Kulina bana, Ministarstvo finansija pod vodstvom ministra Kalamujića demonstrira predanost pružanju efikasnije državne uprave koja je kontinuirano na usluzi građanima.

“Ovo je jedan od pozitivnih primjera da državna uprava ne mora i ne treba da bude troma i da je uvijek na usluzi građanima”, kazao je ministar Kalamujić. Ministar je dodatno istakao i da je otvaranje ovih prodajnih mjesta za sudsku taksu samo jedan od mnogih koraka koje državna uprava može preduzeti kako bi bila efikasnija i pružila bolju uslugu



▲ Detalji sa konferencije: Predsjednik Batotić, ministar Kalamujić i v.d. direktor JP BH Pošte Šehić

građanima. Ovaj uspjeh predstavlja pozitivan primjer kako saradnja između različitih institucija može donijeti konkretnu korist građanima, istovremeno smanjujući administrativne barijere i poboljšavajući pravosudni sistem.

Inicijator ove pozitivne priče je predsjednik Suda, Batotić, koji je podsjetio da je Općinski sud u Sarajevu najveći prvostepeni sud i jedan je od najvećih sudova ne samo u Bosni i Hercegovini nego i regionu. Ima više od 500 zaposlenih i oko 100 sudija te funkcioniра na pet različitih lokacija, što svakako utječe na obavljanje poslova.

Jedan od problema s kojim se susreo je bio i problem naplate, odnosno prodaje sudske takse. Iako Sud nije imao ništa sa prodajom sudske takse, Batotić je ipak pokrenuo inicijativu kako građani ne bi više morali obilaziti trafike po Sarajevu da kupe takse.

Uz puno razumijevanje ministra Kalamujića i direktora Šehića, problem je ri-

ješeno te je danas, kako je Batotić kazao, otvoreno prodajno mjesto u zgradi Općinskog suda u Sarajevu i glavnoj BH Pošti.

“Građani danas imaju mogućnost da na kvalitetniji način ostvare svoja prava u okviru onoga što im pruža Općinski sud u Sarajevu”, naglasio je Batotić.

Bitan segment u ovom procesu je i podrška JP BH Pošta, koja je uvijek na usluzi građanima te je, kako je direktor Šehić naveo, prepoznala i ovaj problem i dio je rješenja.

Kroz konstruktivnu saradnju svih aktera, rješenje ovog problema otvara put ka lakšem ostvarivanju prava građana u okviru pravosudnog sistema.

Ovo značajno poboljšanje ne samo što olakšava građanima pristup sudskim uslugama, već ima i značajan budžetski utjecaj. Na godišnjem nivou, prodaja sudskih taksi generira oko 320.000 transakcija, što čini oko tri miliona KM budžetskih prihoda. ■

Sanela Gorušanović Butigan, sutkinja Općinskog suda u Sarajevu, ponovo izabrana za članicu VSTV-a BiH iz reda općinskih i kantonalnih sudova Federacije BiH



U svim općinskim i kantonalnim sudovima Federacije BiH 16. aprila 2024. godine održani su izbori za člana Visokog sudskog i tužilačkog vijeća BiH iz reda općinskih i kantonalnih sudova, a na kojima su sudije birale svog predstavnika između sedam predloženih kandidata.

U skladu sa dopisom predsjednice Vrhovnog sud FBiH, broj 070-0-Su-24-000 244-2 od 27.03.2024. godine, a nakon provedene izborne procedure glasanja, Sanela Gorušanović Butigan, sutkinja Općinskog suda u Sarajevu, od ukupno 524 važeća glasačka listića osvojila je 303 glasa čime je ponovo izabrana na poziciju članice VSTV-a BiH **iz reda općinskih i kantonalnih sudova.**

Ovom prilikom sutkinji Gorušanović Butigan čestitamo i želimo joj uspjeh u daljem radu, a njeno obraćanje sudijama općinskih i kantonalnih sudova u FBiH nakon objavljenih rezultata, prenosimo u cjelosti:

Poštovane kolegice i kolege,

Zahvaljujem Vam se na ponovo ukazanom povjerenju na izboru za članicu VSTV-a ispred općinskih i kantonalnih sudova u FBiH.

Vaša opredijeljenost da Vas zastupam po drugi put čini me ponosnom, ali i želja i obaveza da opravdam Vaše povjerenje je veća i snažnija.

Svjesni smo izuzetno teških okolnosti u kojima se pravosuđe BiH nalazi, međutim, želja nositelja pravosudnih funkcija za pozitivnim promjenama postoji i ja ću učiniti sve što mogu kao članica Vijeća da stanje u pravosuđu učinim boljim.

Suci općinskih i kantonalnih sudova su najviše opterećeni različitim mjerama u organizaciji pravosuđa i ja ću svoju borbu da se čuje i uvaži vaš glas nastaviti.

Iskustvo koje sam stekla do danas će mi svakako pomoći da djelujem na najbolji način.

Svjesna sam važnosti kvalitetnog kontakta na Vama i cilj mi je da u narednom periodu aktivnije surađujem sa predsjednicima sudova i strukovnim udruženjima kako bi zajedničkim snagama dolazili do najboljih rješenja i željenih ciljeva.

U nadi da ću zadovoljiti vaša očekivanja, toplo vas pozdravljam!




Studenti Internacionalnog univerziteta u Sarajevu posjetili sarajevski Općinski sud

Na dodiplomskom studiju Pravnog fakulteta Internacionalnog univerziteta u Sarajevu tokom ljetnog semestra akademske 2023./2024. godine izvode se obavezni predmeti "Trgovačko pravo II" i „Izvršno i stečajno procesno pravo”. S obzirom da je silabusom predmeta predviđeno da studenti kao obaveznu aktivnost imaju, između ostalog, i posjetu nekoj od institucija u BiH koja je u direktnoj vezi sa predmetnom materijom, 29. marta 2024. godine studenti su posjetili sarajevski Općinski sud. Sudija Nebojša Joksimović, predsjednik Privrednog odjeljenja suda, primio je u Multimedijskoj sali suda studente te im tom prilikom predstavio ukratko nadležnosti i organizaciju rada Suda i sudskih odjeljenja, a poseban akcenat je bio na postupku stečaja i likvidacije.

Sudija Nenad Banduka, predsjednik Izvršnog odjeljenja, dao je studentima više informacija o samom izvršnom postupku kao i o načinu pokretanja istog.

Studenti su posjetili i Odjeljenje registra za upis pravnih lica kojom prilikom su se sastali sa predsjednicom ovog odjeljenja, sutkinjom Ramizom Aganović. Ona im je predstavila rad i nadležnosti ovog odjeljenja te detaljno objasnila proces registracije poslovnih subjekata. Objasnila im je šta je sve potrebno kako bi se jedno društvo moglo registrovati, kao i koje druge promjene stranke mogu na osnovu prijave mijenjati u svom društvu i sl.

Na kraju posjete studenti su izrazili zahvalnost na organizaciji i korisnim informacijama koje su ovom prilikom dobili, a što će im svakako biti od velikog značaja za shvaćanje teoretskog dijela nastavnih predmet. ■





▲ Detalji sa održanog sastanka

Damir Batotić, predsjednik Općinskog suda u Sarajevu, primio delegaciju Samostalnog sindikata državnih službenika i namještenika Kantona Sarajevo - Razgovarano o unapređenju saradnje i prava svih uposlenika

Predsjednik Općinskog suda u Sarajevu Damir Batotić primio je 11. marta 2024. godine predstavnike Samostalnog sindikata državnih službenika i namještenika Kantona Sarajevo sa kojim je razgovarao o aktuelnim dešavanjima i poboljšanju uslova rada uposlenika ovog suda.

Delegacija Sindikata u sastavu predsjednik Elvis Zornić, članovi Upravnog odbora Mahira Selimović, Nihad Kajmović i Amel Hamzić te Ermedin Gočobija, član Sindikalnog odbora Sindikalne organizacije Općinskog suda u Sarajevu, istakli su da naš sindikat kao reprezentativni sindikat zastu-

pa prava svih državnih službenika i namještenika. S tim u vezi ovaj sindikat, u okviru socijalnog dijaloga koji vodi sa Vladom Kantona Sarajevo, može jedini, kada se za to ukaže potreba, slati inicijative za izmjene i dopune Kolektivnog ugovora koji je potpisan na period od dvije godine.

Predsjednik Samostalnog sindikata državnih službenika i namještenika Kantona Sarajevo Elvis Zornić istakao je da se zajednički treba nastaviti sa rješavanjem svih otvorenih pitanja. Zornić je, između ostalog, istakao da se moraju učiniti dodatni naponi kako bi se poboljšao evidencijno narušeni sistem ocjenjivanja, te

uključio sindikat u proces donošenja novog pravilnika o sistematizaciji radnih mjesta. Dodao je da je Samostalni sindikat državnih službenika i namještenika Kantona Sarajevo, kao reprezentativni sindikat za sve državne službenike i namještenike u Kantonu Sarajevo, u devet godina uspješnog rada svojim stručnim inicijativama i učešćem u izradi svih propisa koji se tiču statusa državnih službenika i namještenika uveliko doprinio zaštiti prava državnih službenika i namještenika. O tome svjedoči i šest potpisanih Kolektivnih ugovora, kazao je Zornić, i ponovio da se samo zajedničkim naporima svih uključenih u

proces socijalnog dijaloga može ostvariti dobrobit za granu državne službe.

Članica Upravnog odbora Sindikata Mahira Selimović istakla je da treba unaprijediti internu komunikaciju kako bi svi uposlenici bili pravovremeno informisani i upoznati sa svim poduzetim aktivnostima i planovima. Dodala je da je u interesu svih zajednički rad na rješavanju statusa i uslova rada uposlenika pravosudnih institucija.

Od strane Sindikata istaknuto je da se zajednički pokrenu određene ini-

cijative ka Vladi Kantona Sarajevo kao poslodavcu, a po pitanjima koji se odnose na sud, kao najveću pravosudnu instituciju ne samo u KS već i državi Bosni i Hercegovini, i njegove uposlenike.

Predsjednik Općinskog suda u Sarajevu Damir Batotić kazao je da se on bori za prava svih uposlenika i da ima jednak odnos prema svima. Batotić je predstavio aktivnosti koje su u posljednjoj godini poduzete u Općinskom sudu, poput provedenih edukacija zaposlenika, bolje zdravstvene zaštite, poboljšanju

uslova rada u arhivi, projektnih aktivnosti, planovima za rekonstrukciju fasade Suda i rekonstrukcije zgrade na Ilidži.

Istakao je da će uposlenici imati bolje uslove rada te da je rekonstruisana i biblioteka, postignuta transparentnost u radu, riješeni problemi sa poštom, kao i da se namjerava krenuti u izradu novog pravilnika o sistematizaciji radnih mjesta.

Sastanku su prisustvovali i sekretar Općinskog suda u Sarajevu Senada Smajiš i šef Sektora sudske uprave Mirzet Sudžuka. ■

Dodijeljena priznanja za doprinos transparentnosti pravosuđa u 2023. godini

Priznanja za doprinos transparentnosti pravosuđa u Bosni i Hercegovini (BiH) za 2023. godinu dobile su Azra Bavčić, glasnogovornica Kantonalnog tužilaštva Kantona Sarajevo i Amra Hodžić, glasnogovornica Općinskog suda u Sarajevu. Priznanja su dodijeljena na svečanosti koju je u srijedu (28.02.2024.) u Sarajevu organizirao USAID-ov projekt Pravosuđe protiv korupcije BiH (Projekt) u saradnji sa Udruženjem glasnogovornika u tužilaštvima BiH (Udruženje).

Prilikom odlučivanja o dodjeli priznanja, članovi ocjenjivačkog tijela kojeg su činili predstavnici medijske zajednice u BiH, Udruženja i Projekta, primjenjivali su unaprijed određene kriterije, gdje se posebno cijenila saradnja glasnogovornika sa medijima, redovno i kvalitetno ažuriranje web stranica, te i učešće na obukama i radionicama u organizaciji Projekta.

U obzir za dodjelu priznanja su uzeti glasnogovornici i službeni-



ci za odnose s javnošću partnerskih institucija Projekta (sudovi i tužilaštva sa sjedištem u Sarajevu, Zenici, Mostaru, Tuzli, Bihaću i Banja Luci).

Cilj ove inicijative je promovirati važnost kvalitetnog i pravovremenog informisanja javnosti, te stvoriti poticaj za proaktivan pristup pravosudnih institucija u BiH u komunikaciji s javnošću. Također, cilj je i skrenuti pažnju na značaj uloge koju glasnogovornici u pravosudnim institucijama imaju za jačanje transparentnosti pravosuđa.

Osnovna misija Udruženja koje okuplja glasnogovornike i službenike za odnose s javnošću velikog broja tužilaštava i određenog broja sudova iz cijele BiH je podrška izgradnji nezavisnog, samostalnog i transparentnog pravosuđa u BiH.

USAID u BiH podržava jačanje kapaciteta partnerskih sudova i tužilaštava za borbu protiv korupcije, te provodi aktivnosti koje su usmjerene ka unapređenju integriteta u pravosuđu i jačanja transparentnosti. ■

Vijest preuzeta sa <https://www.usaidjaca.ba/bs/events/86/dodijeljena-priznanja-za-doprinos-transparentnosti-pravosuda-za-2023-godinu>

▲ Učesnice okruglog stola



Rodne predrasude su veliki rizik za integritet sudija

Rodne predrasude u pravosuđu, ukoliko se na vrijeme ne prepoznaju, mogu negativno utjecati na provođenje pravde, istaknuto je na okruglom stolu koji se održao u četvrtak (07.03.2024. godine) u Sarajevu. Ovaj okrugli sto povodom 10. marta, koji se u svijetu obilježava kao Međunarodni dan sutkinja, organiziralo je Udruženje žena sudija u BiH (Udruženje), uz podršku USAID-ovog projekta Pravosuđe protiv korupcije BiH (USAID/JACA).

„Činjenica je kako smo mi sudije u poziciji da odlučujemo o ljudskim sudbinama. Stoga je naša odgovornost i obaveza da se kontinuirano preispitujemo, te da smo uvijek svjesni opasnosti koju sa sobom nose prikrivene rodne predrasude koje nesumnjivo mogu dovesti u pitanje našu nepristrasnost u odlučivanju, ali ugroziti i naš integritet“, rekla

je ovom prilikom Amela Mahić Samardžić, predsjednica Udruženja. Učesnici na okruglom stolu su se složili kako nedostaje edukacija usmjerena na prepoznavanje rodni predrasuda koje mogu postojati u pravosuđu, te da su događaji poput ovog odlična platforma za razmjenu iskustava između sudija i podizanje svijesti o problematici rodni predrasuda i stereotipa, te potencijalne diskriminacije.

U radu okruglog stola u čijem fokusu su bila pitanja sudijske etike i integriteta, pored članica Udruženja, učestvovali su i predstavnici Visokog sudskog i tužilačkog vijeća, te nevladinog sektora i medija u BiH.

„Još jedan značajan izazov za integritet sudija mogu biti i društvene mreže. Ukoliko se nosioci pravosudne funkcije odluče da budu prisutni na društvenim mrežama, pre-

poruka je da budu veoma oprezni i da se dobro upoznaju sa svim postavkama društvenih mreža, kako bi zaštitili svoju privatnost i integritet, kako lični, tako i integritet pravosuđa u cjelini“, rekla je ovom prilikom Lamija Grebo, novinarka Balkanske istraživačke mreže (BIRN) BiH, jedna od uvodničarki na ovom događaju.

Udruženje žena sudija u BiH je nevladina organizacija, čija vizija su educirane, osnažene i osviještene sutkinje u oblasti rodne ravnopravnosti, te kvalitet i profesionalizam u radu, s ciljem jačanja povjerenja javnosti u sudove.

USAID/JACA podržava jačanje kapaciteta partnerskih sudova i tužilaštava za borbu protiv korupcije, te provodi aktivnosti koje su usmjerene ka unapređenju integriteta u pravosuđu i jačanju transparentnosti. ■

Vijest preuzeta sa portala USAID/JACA <https://www.usaidjaca.ba/bs/events/87/rodne-predrasude-su-veliki-rizik-za-integritet-sudija>



Održan sastanak sa predstavnicima nove Sindikalne organizacije sudova i tužilaštva u KS

U prostorijama Općinskog suda u Sarajevu 05. februara 2024. godine održan je sastanak sa rukovodiocima pravosudnih institucija u Kantonu Sarajevu: predsjednikom Općinskog suda u Sarajevu g. Batotić Damirom i glavnom tužiteljicom Tužilaštva Kantona Sarajevu gđom Sabinom Sarajlijom i saradnicima. Pored predsjednika Samostalnog sindikata g. Samira Kurtovića, ispred sindikata sastanku su prisustvovali i predstavnici nove Sindikalne organizacije sudova i tužilaštva KS, kao nove članice SUFBiH – potpredsjednik SO g. Srđan Roljić te članovi gđa. Mirha Hasečić i g. Mahir Helez.

Povod sastanka je bilo upoznavanje rukovodilaca pravosudnih institucija sa formiranjem nove sindikalne organizacije čiji je osnovni

cilj priznavanje profesionalnosti i stručnosti sudske i tužilačke administracije, a tim i adekvatna plaća i mogućnost stručnog usavršavanja i napredovanja. Sve ovo podrazumijeva izdvajanje sudske i tužilačke administracije koja kao jedina prolazi sve sigurnosne provjere i aktivno učešće u svim reformama pravosudnog sistema i priznanje i od strane ne samo Kantonalne vlasti već i VSTV BiH.

Predsjednik sindikata je prezentirao da Granski sindikat ima reprezentativnosti na nivou FBiH i da ima oko 14.000 članova sindikata, da nova SO sudova i tužilaštva KS ima reprezentativnost kao Sindikalna organizacija koja je u sastavu SUFBiH.

Riječ je o administraciji koja je kroz potpisani Kolektivni ugovor,

u kojem nije učestvovala, doživjela diskriminaciju u pogledu utvrđenih dodataka, jer postoje mnogi sa 0% dodatka na platu. Upravo primarni cilj je kako jednakost pred zakonom tako i pred kolektivnim ugovorom, sa čim su bili saglasni i rukovodioci institucija koji su i samoinicijativno pokretali izmjene, ali postojeći sindikat to nije podržao.

Slogan ove SO na čelu sa SUFBiH je jednakost za sve uposlenike uz konstruktivan dio u cilju boljih uslova kako uposlenika, tako i usluga za građane, a koje su već uveliko prepoznate u javnosti.

Na kraju sastanka svi učesnici su izrazili spremnost za nastavak saradnje u cilju zaštite prava radnika o postizanja boljih uslova rada. ta u radu. ■



▲ Predstavnici Općinskog suda u Sarajevu i OSCE-a

Održan sastanak sa predstavnicima OSCE-a na temu monitoringa postupaka u predmetima korupcije

Misija OSCE-a u Bosni i Hercegovini, u sklopu svojih zalaganja da pomogne vlastima u borbi protiv visoke korupcije i organizovanog kriminala, uz finansijsku podršku Evropske komisije, implementira Regionalni projekat praćenja sudskih postupaka u predmetima organizovanog kriminala i korupcije na Zapadnom Balkanu (projekat), zajedno sa Misijama OSCE-a u Podgorici, Prištini, Skoplju i Tirani. S tim u vezi predstavnici OSCE-a posjetili su Općinski suda u Sarajevu 06. februara 2024. godine, kojom prilikom je održan sastanak sa Damirom Batotićem, predsjednikom suda i Denisom Kurtovićem zamjenikom predsjednika suda/predsjednikom Krivičnog odjeljenja. Sastanak je održan na temu praćenja sudskih postupaka u predmetima korupcije koji se vode u ovom sudu. Predstavnici OSCE-a koji vrše monitoring u navedenim pred-

metima na sastanku su predstavili i publikaciju „Praćenje postupaka u predmetima organizovanog kriminala i korupcije u BiH“ sa preporukama pravosudnim institucijama. Tokom sastanka predsjednik suda i njegov zamjenik upoznali su prisutne sa načinom funkcionisanja ovog suda i Krivičnog odjeljenja, sa organizacionim izazovima te idejama i planovima čija bi implementacija uveliko doprinijela unapređenju sudskih postupaka kao i efikasnijem suđenju u predmetima korupcije.

Učesnici sastanka razmijenili su iskustva te zaključili da je sastanak bio vrlo koristan te da će se ovakvi sastanci planirati i u budućnosti.

Sastanku su u ime OSCE-a prisustvovali pravni savjetnici Meagan Smith-Hrle i Nenad Đurić te Azra Gavrankapetanović Omerika, službenica za praćenje sudskih postupaka. ■



Radni sastanak direktora Sudske policije i predsjednika Općinskog suda u Sarajevu

Direktor Sudske policije u Federaciji Bosne i Hercegovine, g. Dženan Gošo, posjetio je 26. decembra 2023. godine Općinski sud u Sarajevu gdje je održao sastanak sa predsjednikom istog suda, g. Damir Batotićem.

Na navedenom sastanku se razgovaralo o izazovima u radu koji su za Sudsku policiju i ovu pravosudnu instituciju prouzrokovani izmještanjem svih lica iz pritvora Kazneno-popravnog zavoda Sarajevo u druge kazneno popravne zavode u Federaciji Bosne i Hercegovine, te potrebi poduzimanja koordiniranih aktivnosti u pravcu određivanja prioriteta kod rekonstrukcije prostorija

u kojima je ranije bio smješten Kazneno-popravni zavod u Sarajevu i koji će nakon rekonstrukcije koristiti sudovi u Kantonu Sarajevo, kao i Centar sudske policije u Kantonu Sarajevo.

Također, na navedenom sastanku se razgovaralo i o aktivnostima Sudske policije koje su u proteklom periodu za cilj imale unapređenje sistema tehničke zaštite zgrade ovog suda, kao i dislociranih odjeljenja suda, a što će svakako doprinijeti povećanju stepena sigurnosti objekta i osoba u istim.

Pored navedenog, tema sastanka je bila i uloga Sudske policije, odnosno eventualna nadležnost Sudske

policije za postupanje u prekršajnim postupcima, gdje se razgovaralo o trenutnim zakonskim okvirima, izazovima u radu i postupanju u praksi.

Navedenom sastanku je prisustvovao i načelnik Centra sudske policije u Kantonu Sarajevo g. Mirza Biber i šef Sektora sudske uprave Općinskog suda u Sarajevu g. Mirzet Sudžuka, a dijelu sastanka i g. Emir Hasanbegović – sudija istog suda, te je zaključeno da je održavanje ovakvih sastanaka od značaja za rad pravosudnih institucija i Sudske policije. ■

Vijest preuzeta sa portala Sudske policije u FBiH <https://sudpol-fbih.pravosudje.ba/vstvfo/B/257/article/130752>



▲ Dženan Gošo, direktor Sudske policije u FBiH i Damir Batotić, predsjednik Općinskog suda u Sarajevu



▲ Predstavnici Općinskog i Kantonalnog suda u Sarajevu

Redovni godišnji sastanak predsjednika Općinskog i Kantonalnog suda u Sarajevu

Vladimir Špoljarić, predsjednik Kantonalnog suda u Sarajevu te Mediha Gagrica, pomoćnica predsjednika suda, posjetili su 26. decembra 2023. godine sarajevski Općinski sud te je tom prilikom održan redovni godišnji sastanak sa Damirom Batotićem, predsjednikom tog suda.


Na sastanku je predstavljen izvještaj o radu ovog suda za 11 mjeseci 2023. godine, kao i realizacija planova rješavanja starih predmeta. Poseban akcenat je stavljen na analizu procentualne realizacije kvaliteta sudskih odluka kao i na najčešće razloge ukidanja i preinačavanja odluka ovog suda od strane Kantonalnog suda u Sarajevu. U odnosu na početak 2023 godine, sud trenutno ima 12 sudija manje, a navedeno se svakako odrazilo i na ukupnu normu suda. Međutim, i pored nedostatka u broju sudija, a prema podacima iz izvještaja o ra-

du za 11 mjeseci, sud je savladao priliv i smanjio broj neriješenih strukturalnih predmeta za cca 200.

Na sastanku je predstavljen i izvještaj o protoku predmeta iz oblasti koruptivnih krivičnih djela, a također je i jedna od tačaka dnevnog reda bila i transparentnost Općinskog suda u Sarajevu kao i projekti koji se trenutno realizuju.

Pored predsjednika Batotića, ispred Općinskog suda u Sarajevu sastanku su prisustvovali i Mirzet Sudžuka, šef Sektora sudske uprave, te Muris Lončarević, šef odsjeka za upravljanje sudskim predmetima.

Inače, shodno članu 9. Pravilnika o unutrašnjem sudskom poslovanju propisano je da predsjednici viših sudova, prema potrebi, a najmanje dva puta godišnje, održavaju sastanke s predsjednicima nižestepnih sudova u okviru svoje nadležnosti. ■





Intervju za portal Vijesti.ba

Batotić o radu Općinskog suda u Sarajevu, dužini procesa, rješenjima, lažnim dojavama

Predsjednik Općinskog suda u Sarajevu, Damir Batotić, u razgovoru za Vijesti.ba govorio je o aktuelnostima unutar suda, poteškoćama s kojima se nose, ali i o budućim planovima za poboljšanje rada ovog suda.

„Općinski sud u Sarajevu je najveći sud u BiH i jedan je od najvećih sudova u cijelom regionu Zapadnog Balkana. Prema pravilniku o unutrašnjoj organizaciji i sistematizaciji radnih mjesta, mi bismo trebali imati 639 zaposlenih, od čega bi trebalo biti 101 redovni sudija, 36 dodatnih sudija, a po novom Pravilniku, kojem je saglasnost dao VSTV BiH te s obzirom da se institut dodatnih sudija gasi s prvim

januarem 2027. godine, mi bismo s tim datumom trebali imati 137 redovnih sudija te 711 zaposlenih, poručio je Batotić.

Ističe da sud trenutno ima preko 500 zaposlenih, od čega je 95 sudija i to 87 redovnih i osam dodatnih, dok su finansijska sredstva obezbjeđena samo za 111 sudija, a što je daleko manje od onoga što bi trebali imati po novom Pravilniku o unutrašnjoj organizaciji i sistematizaciji radnih mjesta.

„Kada je riječ o radu suda, isti funkcionise i obavlja svoje djelatnosti na pet različitih lokacija. To je svakako nešto što dodatno usložnjava poslovanje ovog suda. Stvarna nadležnost suda je definisana razli-

čitim zakonima. Kada je u pitanju mjesna nadležnost, ovdje se radi o provostepenom sudu koji obuhvata područje Kantona Sarajevo. Na tom području se nalaze sjedišta kantonalnih i federalnih institucija, javnih preduzeća te diplomatsko-konzularnih predstavništava i slično, a što svakako utječe na strukturu predmeta koji se svakodnevno za primaju u ovome sudu i kojih drugi sudovi nemaju.

Osnovna misija suda je dosljedno sprovođenje principa ustavnosti i zakonitosti, neovisno i transparentno postupanje u postupcima koji se vode u sudu, a što za posljedicu ima poštivanje osnovnih ljudskih prava i efikasnost u ostvarivanju tih pra-

va. Polazište i ishodište svih ciljeva treba biti vladavina prava.

U tom pravcu, Batotić ističe da menadžment suda ulaže mnogo truda kako bi sud bio funkcionalan i moderan te kako bi se građanima olakšalo ostvarivanje njihovih prava.

“Kada govorimo o radu Zk ureda, u prethodnom periodu smo preduzeli niz aktivnosti kako bi sud bio funkcionalniji te kako bismo građanima olakšali ostvarivanje njihovih prava. Ranije su se u ra-

nim jutarnjim satima formirale kolone građana koje su čekale u redu radi ostvarivanja svojih prava u ZK uredu. Sada, kada ujutro prođete pored zgrade suda, odnosno šalter sale Zk ureda, više neće te vidjeti te kolone.

Kada je riječ o radu Odjeljenja registra za upis pravnih lica, predsjednik je istakao da je ponosan na uvođenje elektronskog upisnika kojim se omogućava strankama praćenja predmeta iz nadležnosti Registra.

“Kada stranka preda predmet u pisarnici Registra, može putem Web stranice suda ili QR coda pratiti dinamiku njegovog rješavanja. Koliko mi je poznato, ovakav način praćenja rješavanja predmeta se trenutno primjenjuje isključivo u našem sudu“.

Na pitanje o dinamici rješavanja stečajnih postupaka na sudu, s obzirom da se radi o predmetima koji su inače hitne prirode, Batotić naglašava da Općinski sud u Sarajevu ima specijalizovano Privredno odjeljenje koje se bavi isključivo ovom vrstom predmeta.

“Sve sudije Privrednog odjeljenja rade stečajne predmete i istina je da imamo određeni broj “velikih stečajnih postupaka“ čija je dinamika rješavanja složenija, a što znatno utječe na dužinu trajanja postupa-

ka u odnosu na “male“ stečajne postupke kao što su npr. oni u kojima nema stečajne mase te se isti brzo rješavaju.

Kada je riječ o dužini trajanja sudskih postupaka, a o ovom problemu se često govori u javnosti, predsjednik suda govori da sud, odnosno sudije, na početku svake godine od VSTV-a BiH dobivaju Plan rješavanja (starih) predmeta, koji su su-

dije dužne realizovati tokom godine. Realizacija tog Plana utječe na ocjenu svakog sudije pojedinačno. Često dužina trajanja postupaka ne ovisi samo o radu suda već i o dru-

anonimnih dojava o postavljenim minsko-eksplozivnim napravama u zgradi Suda. Pri tome se svaki put potpuno obustavlja rad suda do okončanja kontra-diverzionog pregleda prostorija, uposlenici su primorani napustiti radna mjesta, otkazuje se veliki broj ročišta, a što u konačnici ima nesagledive posljedice na rezultate rada suda, ostvarenu normu sudija, ali i na materijalne izdatke kako suda tako i stranaka u postupku. Međutim, nakon poduzimanja određenih aktivnosti te zahvaljujući dobroj saradnji sa Kantonalnim tužilaštvom KS, MUP-om KS te Odjeljenjem sudske policije u KS, situacija se po tom pitanju znatno popravila“, naglasio je Batotić.




Foto: Sulejman Omerbašić

gim faktorima poput punomoćnika stranaka u postupku, dojava o postavljenim minsko-eksplozivnim napravama i sl.

Kada je riječ o problemima u radu, svakako treba spomenuti i česte anonimne dojava o postavljenim minsko-eksplozivnim napravama u Palati pravde, a zbog kojih je rad suda ozbiljno ugrožen. Samo u ovoj godini takvih je dojava bilo 12, a u prethodnoj godini 15 te je u tom periodu bilo odgođeno preko 3.300 ročišta.

„Općinski sud u Sarajevu se duži period susretao sa problemom

Koliko sudu predstavlja problem nedostatak sudija koji postupaju u predmetima i koja je to institucija koja bi Vama zapravo trebala omogućiti potreban broj sudija?

“Nama uvijek nedostaje sudija, odnosno stručnih saradnika, i sud generalno ima problema sa nedostatkom nosilaca pravosudnih funkcija. Naime, Vlada KS prije svega treba obezbijediti sredstva za određeni broj sudija koji nedostaje. Na osnovu našeg zahtjeva, a nakon obezbijeđenih sredstava od strane Vlade KS, VSTV BiH vrši izbor nosilaca pravosudnih funkcija na osno-

vu našeg zahtjeva. U ovom trenutku mi imamo 95 sudija. Od strane VSTV-a BiH 21.12.2023. godine je imenovano 10 sudija koji će sa radom početi u drugoj polovini januara 2024. godine. Taj broj je još uvijek nedovoljan jer imamo obezbijedena sredstva za 111 sudija. Dakle, mi ne možemo imati više sudija jer nemamo sredstava, a trebali bismo po sistematizaciji imati 137 sudija. Da imamo te sudije na raspolaganju, rezultati rada suda bi bili znatno bolji“, dodaje.

Na pitanje o kojem iznosu se radi i koliko je sredstava potrebno kako bi sud imao optimalan broj sudija, Batotić navodi da je trenutno problem budžet suda jer je istim limitirano i povećanje broja sudija. Osim toga, kada je u pitanju Općinski sud u Sarajevu, prijedlog budžeta za 2024. godinu je manji od budžeta koji je predložen od strane ovog suda, a što će svakako utjecati na aktivnosti koje sud namjerava realizovati u narednoj godini.

Da li se planiraju neke aktivnosti u Zk uredu na način kao što je to trenutno u Registru, dobivanje informacija putem QR kod i sl.?

“Naravno. Kada je u pitanju Zk ured, mi smo u prethodnom periodu imali razgovore sa partnerima sa ciljem uspostavljanja sistema kako bi se građanima omogućilo da vrše uvide u stanje elektronskih zemljišnih knjiga na nekom dnevnom nivou. Također, imali smo razne sastanke s notarima, nadležnom poreznom upravom i oni su iskazali zainteresovanost da im se omogućí pristup elektronskoj zemljišnoj knjizi, a što bi im olakšalo postupanje u predmetima koje provode”, dodao je.

Poznato nam je da je Uprava za indirektno oporezivanje počela s primjenom elektronskog popisa u skladu sa zakonom. Da li to planira ili već primjenjuje sud?

“Što se tiče elektronskog potpisa, uskoro će se početi primjenjivati novi program u Odjeljenju registra za upis pravnih lica. Pilot sud je bio Općinski sud u Travniku. Naši uposlenici će dobiti mogućnost tog elektronskog potpisati kako bi se neke stvari mogle verifikovati”, poručio je.

Na pitanje da li ima u planu digitalizaciju procesa s obzirom da već postoje sudovi u BiH koji primjenjuju tu praksu, Batotić odgovara da je to u nadležnosti VSTV BiH.

“Mi skeniramo dokumente koje dolaze u sud, a sve što

se odnosi na sudske predmete, imamo u CMS sistemu, dakle u elektronskoj formi“.

Ističe da je uprava suda uočila problem sa arhiviranjem spisa te da sud posjeduje

Arhivu u glavnoj zgradi kao i još dva prostora u kojima se nalaze arhivirani spisi. Riječ je o arhivskim prostorima koji su dislocirani u odnosu na sud. Samo iznajmljivanje prostora za odlaganje arhiviranih spisa utječe na povećanje troškova, a isti se povećavaju iz godine u godinu jer se broj takvih predmeta stalno povećava te se samim tim i povećava potreba za dodatnim prostorom gdje bi mogli arhivirati spise.

“Predstavnicima izvršne vlasti u Kantonu Sarajevo smo predlagali sistem digitalizacije arhive“ projekat ‘Arhiva bez papira’, a koji bi se mogao primjeniti i na ostale institucije u Kantonu Sarajevo naročito iz razloga što mi, kao što

sam prethodno kazao, sve podatke iz spisa (novijih) imamo u elektronskoj formi. S obzirom na navedeno, danas nam za rekonstrukciju spisa treba pet minuta”, naglasio je.

Često se sudovi u javnosti doživljavaju kao da sporo rade. Šta je odgovor predsjednika Općinskog suda na to. Je li to samo do sudova?


“Percepcija javnosti je takva kakva jeste. Mi se trudimo i nastojati ćemo da jednoga dana budemo potpuno funkcionalan, moderan sud. Brzina rješavanja predmeta zavisi od različitih faktora. Mi i kada donesemo određenu odluku, imate postupke po redovnim i vanrednim pravnim lijekovima i to građanima djeluje jako dugo. Ima tu sigurno i nekih stvari koje se mogu poboljšati i mi ćemo u narednom periodu nastojati da radimo na tome, objašnjava nam Batotić.

Javnost ima dojam da za propuste, nemare sudija, nema adekvatnih sankcija. Javnost ima dojam da su to simbolične sankcije? Kako komentarišete to?

“Sve vezano za sankcionisanje sudija je u nadležnosti Ureda disciplinskog tužitelja pri VSTV-u BiH. Ja kao predsjednik suda te prijave prosljeđujem VSTV-u BiH, ali i sami građani to često direktno podnose toj instituciji. Nakon toga te prijave su predmet preispitivanja UDT-a.

Za kraj smo pitali predsjednika na koga želi da apeluje da se promjeni stanje u sudu i koje su to instance koje mogu pomoći da se to implementira u budućnosti?

“Mi smo pokrenuli različite procese sa ciljem da omogućimo građanima vladavinu prava te je ishodište tih procesa da pravda bude ne samo kvalitetna već i blagovremena”, zaključio je. ■



Održan sastanak sa predstavnicima Komisije za uništenje oduzetog oružja i municije pri MUP-u KS

Na inicijativu predstavnika Ministarstva unutrašnjih poslova Kantona Sarajevo (MUP KS), u prostorijama Općinskog suda u Sarajevu 13. decembra 2023. godine održan je sastanak na temu uništavanja oduzetog oružja i municije u krivičnim i prekršajnim predmetima. Ispred Općinskog suda u Sarajevu sastanku su prisustvovali Damir Batotić, predsjednik suda, sudija Emir Hasanbegović, šef Prekršajnog odjeljenja opće nadležnosti, Muris Lončarević, šef pisarnica te Lejla Išerić, stručni saradnik za izvršenje krivičnih sankcija.

Ispred MUP-a KS sastanku su prisustvovali Muhamed Imširović, komandir PS Centar te ujedno i



predsjednik Komisije za uništenje oduzetog oružja i municije pri MUP-u KS te Nijaz Zolj, viši referent za oružje i municiju MUP-a KS.

Učesnici sastanka razgovarali su o aktuelnim temama iz oblasti krivičnog i prekršajnog postupka, a sve u cilju unapređenja saradnje između Suda i MUP-a KS. ■

Svečano obilježena 20. godišnjica Općinskog suda u Sarajevu

U restoranu Nova Bentaša 15. decembra 2023. godine svečano je obilježeno dvadeset godina od formiranja Općinskog suda u Sarajevu.

U svom kratkom obraćanju prisutnima, predsjednik je čestitao uposlenicima jubilarnu 20. godišnjicu suda te im se zahvalio na dosadašnjim rezultatima rada istakavši kako vjeruje da će zajedničkim zalaganjem i trudom rezultati rada u narednom periodu biti još bolji. Svečanom obilježavanju Dana suda prisustvovalo je preko 200 uposlenika.

Općinski sud u Sarajevu formiran je 15.12.2003. godine spajanjem



sarajevskog Općinskog suda I i II te spajanjem devet općinskih su-

dova za prekršaje. Po broju uposlenika najveći je sud u BiH. ■





▲ Novoimenovani stručni saradnici

Počeli sa radom novoimenovani stručni saradnici Općinskog suda u Sarajevu

Visoko sudsko i tužilačko vijeće BiH (VSTV BiH) je tokom sjednice koja je održana 08. i 09. novembra 2023. godine u Sarajevu, donijelo odluku o imenovanju nosilaca pravosudnih funkcija u Bosni i Hercegovini. Na poziciju stručnih saradnika Općinskog suda u Sarajevu imenovani su Azemina Čelik-Bahtić, Nina Mujkanović Majkić te Anes Nanić.

Povodom stupanja na dužnost novoimenovanih stručnih saradnika Općinskog suda u Sarajevu, Damir Batotić, predsjednik suda, održao je 11. decembra 2023. godine kraći sastanak kojom prilikom je saradnicima poželio sreću i uspjeh u budućem radu te im predstavio ukratko organizaciju rada suda i pojedinačnih sudskih odjeljenja.

Stručni saradnici bit će raspoređeni na Vanparnično odjeljenje, Odjelje-

nje registra za upis pravnih lica te Odjeljenje za sporove male vrijednosti – Ilidža.

Pri donošenju Odluke o imenovanju, VSTS BiH uzima u obzir kriterije poput: stručnog znanja, radnog iskustva i radnih rezultata; stručne sposobnosti zasnovane na dosadašnjim rezultatima u karijeri; sposobnosti da nepristrasno, savjesno, marljivo, odlučno i odgovorno obnaša dužnosti u okviru funkcije za koju se prijavljuje; odnosa sa radnim kolegama, ponašanja van posla, profesionalne nepristranosti i ugleda te iskustva na rukovodećim poslovima.

Pri imenovanju, VSTV BiH primjenjuje odgovarajuće ustavne odredbe kojima se uređuju jednaka prava i zastupljenost konstitutivnih naroda i ostalih te poštuje ravnomjernu zastupljenost spolova. ■





▲ Predstavnicí Notarske komore FBiH

Održan sastanak sa predstavnicima Notarske komore FBiH

Sastanak sa predstavnicima Notarske komore FBiH održan je u Kabinetu predsjednika suda 30. novembra 2023. godine. Riječ je o redovnom godišnjem sastanku koji se održava s ciljem analize rada notara, utvrđivanja eventualnih problema u radu te unapređenju postojeće saradnje.

Na sastanku se, između ostalog, razgovaralo o brzini rješavanja ostavinskih predmeta kojima su zaduženi notari, kao povjerenici suda, kao i o pritužbama na rad istih, a kada je riječ o unapređenju saradnje između suda i Notarske komore, predloženo je da se notarima, radi lakšeg i bržeg postupanja po predmetima, omogući pristup elektronskoj bazi podataka Zemljišnoknjižnog ureda kao i Odjeljenja registra za upis pravnih lica Općinskog suda u Sarajevu. Na taj način bi se postigla efikasnost u radu, ali

bi se znatno i olakšalo strankama. Sastanku su prisustvovali Damir Batotić, predsjednik Općinskog suda u Sarajevu, Ramiza Aganović, predsjednica Odjeljenja registra za upis pravnih lica, Jasmina Aljičević, predsjednica Vanparničnog odjeljenja te Muris Lončarević, šef pisarnica suda. Ispred Notarske komore FBiH sastanku su prisustvovali notarka Nerminka Hamidović, predsjednica Notarske komore FBiH, notari Dragan Miletić, član Upravnog odbora i Sefedin Suljević, predsjednik Komisije za stručno usavršavanje te Hejdi Petrović, rukovoditeljica Stručne službe.

Na kraju sastanka su dogovorene buduće aktivnosti Notarske komore FBiH i Općinskog suda u Sarajevu, a sa ciljem jačanja zajedničke saradnje i postizanja zadovoljstva krajnjih korisnika - stranaka. ■




Studentice Pravnog fakulteta Univerziteta u Sarajevu posjetile sarajevski Općinski sud

S obzirom da je sticanje praktičnih znanja i vještina jako bitan segment za svakog studenta tokom obrazovanja, studentice Pravnog fakulteta Univerziteta u Sarajevu posjetile su 22. novembra 2023. godine sarajevski Općinski sud. Cilj posjete bila je edukacija, odnosno praktično razumijevanje pravnog sistema te uloga i funkcija suda.

U sklopu posjete, studentice su imale priliku obići šalter-salu suda, sudnice, Prijemnu kancelariju, Zk ured, pisarnicu Odjeljenja registra za upis pravnih lica, sobu za dokaze te dobiti više informacija o načinu rada istih. Predstavljen im je sistem za automatsko upravljanje predmetima (CMS) te su praktično mogle vidjeti proces od evidentiranja podnesaka u Prijemnoj

kancelariji pa do formiranja spisa. Sutkinja Amra Hedžić Hadžić, predsjednica Parničnog odjeljenja suda, predstavila im je ukratko nadležnosti odjeljenja, način organizacije rada te im dala više informacija o samom parničnom postupku. Studentice su istakle da im je današnja posjeta sudu bila korisna i sadržajna te da su imale priliku mnogo toga novog naučiti. ■



▲ Studentice u kabinetu sutkinje Amre Hedžić Hadžić, predsjednice Parničnog odjeljenja

Vildana Fajić Poturović, sutkinja Općinskog suda u Sarajevu, u studijskoj posjeti Visokom vijeću za pravosuđe Portugala i sudu u Sintri

U periodu od 07. do 11. novembra 2023. godine, Vildana Fajić Poturović, sutkinja Općinskog suda u Sarajevu, kao članica Regionalne radne grupe za zapadni Balkan za pravosudni menadžment, boravila je u studijskoj posjeti Visokom vijeću za pravosuđe Portugala, koje se nalazi u Lisabonu, a u okviru kojeg je posjetila i sud u Sintri, odnosno, Odjeljenje za istrage i krivične radnje, upravni i fiskalni sud.

Svrha ove posjete je diskusija i razmjena iskustava u vezi sa glavnim građanskim procesnim preprekama sa kojima se sudije susreću u svom radu, kao i vođenje predmeta kroz zakonska rješenja za prevazilaženje različitih izazova, uključujući: veliki obim posla, prikupljanje i analiza složenih pravnih pitanja, efi-



▲ Sutkinja Fajić Poturović (u sredini)

kasno upravljanje postupcima kao i nedostatak praktične implementacije raspoloživih alata za sprovođenje procesne discipline.

Ovu studijsku posjetu omogućio

je Program reforme pravosuđa za zapadni Balkan koji finansira Kraljevina Norveška, a implementira Norveška sudska administracija (NCA). ■

Planirano obavljanje stručne prakse za 65 studenata Pravnog fakulteta u Sarajevu

Na Pravnom fakultetu Univerziteta u Sarajevu 01. novembra 2023. godine održan je koordinacioni sastanak na kojem je planirano obavljanje stručne studentske prakse na Općinskom sudu u Sarajevu za 65 studenata u zimskom semestru akademske 2023/2024. godine. Studentima je predstavljen i podijeljen novi edukativno-resursni materijal „Priručnik za studente za obavljanje stručne prakse u pravosudnim institucijama i advokaturi“. S ciljem povećanja kvalitete stručnih praksi i efikasnijeg ostvarenja ciljeva praktičnog osposobljavanja, svi



▲ Adisa Zahiragić, sutkinja Kantonalnog suda u Sarajevu, tokom obraćanja studentima Pravnog fakulteta

studenti koji budu obavljali praksu imat će na raspolaganju ovaj edukativni materijal koji sadrži niz praktičnih smjernica usklađe-

nih sa “Priručnikom za mentore” kojeg mentori već koriste u radu sa studentima. ■

Održan sastanak sa predstavnicima JP BH Pošte



Sastanak Damira Batotića, predsjednika Općinskog suda u Sarajevu, sa predstavnicima JP BH Pošta održan je 15. novembra 2023. godine u prostorijama Općinskog suda u Sarajevu.

Sastanak je održan na temu unapređenja saradnje između suda i JP BH Pošta, a poseban akcenat je stavljen na dostavu sudskih pismena kao i cijene poštanskih usluga.

Pored navedenog, bilo je i riječi o mogućoj budućoj saradnji suda sa BH Poštom, a koja bi se odnosila na prodaju sudske takse, te je zaključeno da će se u vezi sa navedenim pokušati zakazati sastanak sa premijerom i nadležnim ministri-



ma Vlade Kantona Sarajevo u čijoj je nadležnosti naplata sudske takse. Današnjem sastanku su prisustvovali Mujić Mirsad, generalni direktor te Motoruga Nedim, izvršni di-

rektor JP BH Pošte, sudija Denis Kurtović, zamjenik predsjednika suda, Senada Smajiš, sekretar suda te Sanda Kamišević, šefica Računovodstva. ■

Devet sudija Općinskog suda u Sarajevu stupilo na dužnost 22.01.2024. godine

Sastanak Damira Batotića, predsjednika suda, sa novoimenovanim sudijama Općinskog suda u Sarajevu održan je 22. januara 2024. godine. Sastanak je upriličen u biblioteci suda, a predsjednik je u svom kratkom obraćanju sudijama poželio dobrodošlicu te uspjeh u budućem radu. Ukratko ih je informisao o organizaciji rada suda i sudskih odjeljenja te ih obavijestio na kojim će referatima raditi.

Shodno potrebama sudskih odjeljenja, četvero sudija je raspoređeno na Izvršno odjeljenje, troje na Parnično te po jedan sudija na Privredno te Odjeljenje registra za upis pravnih lica.

Inače, Visoko sudsko i tužilačko vijeće BiH je tokom drugog dana sjednice vijeća, a koja je održana 21. decembra 2023. godine, imenovalo 10 sudija Općinskog suda u Sarajevu i to:



▲ Novoimenovane sudije na sastanku sa predsjednikom suda

- Zlatana Bilića,
- Berinu Feto-Fočak,
- Dianu Dočkal,
- Tatjanu Krunic Pečenicu,
- Marijanu Rajčević,

- Lejlu Džaferbegović,
- Dženanu Sipović,
- Nerzudina Rizvića,
- Amara Osmančauševića,
- Ivanu Šarabu. ■

Za sudije i uposlenike Registra te IKT odsjeka organizovana dvodnevna obuka na temu korištenja programa za elektronsku registraciju poslovnih subjekata

Pod pokroviteljstvom IFC-a, u prostorijama QSS-a u Sarajevu održana je dvodnevna obuka za sudije i uposlenike Odjeljenja registra za upis pravnih lica te IKT odsjeka Općinskog suda u Sarajevu. Obuke su održane u periodu 23.-24. te 26.-27. oktobar 2023. godine.

Cilj obuke bilo je upoznavanje sa novim softverom za registraciju poslovnih subjekata, a koji će se implementirati u FBiH nakon što se usvoje podzakonski akti koji su

trenutno u fazi donošenja. Novi način rada pretpostavlja brzu komunikaciju između suda i strana-ka kao i brže osnivanje poslovnih subjekata i to sve na jednom mjestu. Jedan od dugoročnijih ciljeva je i da zainteresovana lica vrše podnošenje prijava za registraciju online putem te da se cijela procedura na neki način digitalizuje uz

upotrebu elektronskog potpisa kao i da se uspostavi elektronska komunikacija između odjeljenja registra poslovnih subjekata u sudovima FBiH, Porezne uprave FBiH, Zavoda za statistiku FBiH, Ministarstva privrede Kantona

Sarajevo, nadležnih općinskih službi prema sjedištu poslovnih subjekata kao i drugih učesnika u postupku registracije. ■



▲ Detalji sa održane obuke



Unapređenjem procesne discipline i kaznene politike do efikasnijeg procesuiranja krivičnih djela korupcije i organizovanog kriminala

Uspostavljanje adekvatnog okvira za monitoring rada sudova i tužilaštava usmjerenog na odgovornost i kvalitet, s jedne strane, i strateška saradnja sudova, tužilaštava, policijskih agencija s druge strane, ključni su elementi za adekvatno procesuiranje predmeta organiziranog kriminala i korupcije - jedan je od zaključaka konferencije „Završna razmatranja: efikasnije i kvalitetnije procesuiranje krivičnih djela organiziranog kriminala i korupcije“.

Riječ je o četvrtom po redu događaju koji je Visoko sudsko i tužilačko vijeće Bosne i Hercegovine organizovalo uz podršku Evropske unije u BiH s ciljem jačanja dijaloga predstavnika sudova, tužilaštava, agencija za provođenje zakona, izvršne vlasti i advokatske zajednice, a u svrhu kreiranja seta mjera i preporuka za efikasnije procesuiranje ovih krivičnih djela.

Kako je tokom događaja istaknuto, u narednom periodu intenzivno će se raditi i na jačanju procesne discipline, unapređenju u oblasti imenovanja sudija i tužilaca koje će se zasnivati prioritarno na principu stručnosti, odgovornosti i kvaliteta, ali i unapređenju kvaliteta optužnica i istražnih postupaka. Kao jedan od načina za efikasnije procesuiranje krivičnih djela korupcije i organizovanog kriminala, prepoznata je i mogućnost formiranja specijaliziranih timova u sudovima i tužilaštvima za borbu protiv organiziranog kriminala i korupcije koje će činiti



najbolje sudije i tužioci koji imaju sposobnost, znanje, odgovornost i kvalitetu za procesuiranje organiziranog kriminala i korupcije.

Predsjednik VSTV-a BiH, Halil Lagumdžija, tokom svog obraćanja još jednom je ukazao na neophodnost sinhronizovanog i sistemskog djelovanja u ovoj oblasti na nivou cijelog pravosuđa, gdje VSTV BiH mora u punom kapacitetu koristiti sve ovlasti i mehanizme kojim raspolaže kao regulatorno pravosudno tijelo. Kako je istakao, cilj VSTV-a BiH je uspostaviti snažan i stabilan sistem koji će voditi ka unapređenju, prije svega procesne discipline i kaznene politike, a što će u konačnici značiti efikasnije procesuiranja krivičnih djela korupcije i organizovanog kriminala.

Elmerina Ahmetaj Hrelja, iz Delegacije EU, naglasila je da izvještaji i ekspertna mišljenja EU jasno i precizno identificiraju izazove s kojim se suočava pravosuđe u bor-

bi protiv organiziranog kriminala i korupcije te nude rješenje zasnovana na iskustvima i standardima EU. Neka od tih rješenja uključuju i proaktivan pristup istrazi, efikasno upravljanje sudskim postupkom, jasno obrazložene odluke kao i unapređenje kaznene politike koja će u konačnici imati odvratajući efekat. Konferenciji koja je organizovana u okviru Projekta „EU podrška reformama pravosuđa u BiH“ koji se realizuje uz finansijsku podršku EU u BiH, su prisustvovali predstavnici VSTV-a BiH, EU u BiH, predsjednici sudova / predsjednici krivičnih odjeljenja u sudovima, glavni tužioci / zamjenici glavnih tužilaca i predstavnici agencija za provođenje zakona, a osnovni cilj konferencije bio je unaprijediti saradnju među relevantnim institucijama u BiH radi postizanja učinkovitijeg procesuiranja organizovanog kriminala i korupcije. ■

Za sudije Općinskog suda u Sarajevu organizovan kurs engleskog jezika

U okviru internog programa edukacije koji se provodi u Općinskom sudu u Sarajevu, organizovan je kurs engleskog jezika za sudije. Kurs se održava jednom sedmično u biblioteci suda, a formirane su dvije grupe – početna i napredna. Cilj organizovanja kursa je unaprjeđenje konverzijskih vještina i korištenja pravne terminologije, a u skorijoj budućnosti je planirano organizovanje slične obuke i za ostale uposlenike suda.

Također, u sudu se trenutno provode i aktivnosti na izradi priručnika iz oblasti poslovne komunikacije za uposlenike suda. Cilj ovakvih



▲ Sutkinje Općinskog suda u Sarajevu na kursu engleskog jezika

aktivnosti je da se specijalnim priručnikom iz ove oblasti (koji će se odnositi na djelatnosti pravosudne administracije najvećeg suda u Bosni i Hercegovini) te nakon toga i

namjeravanim edukacijama uposlenika suda, unaprijedi kvalitet pružanja usluga za korisnike, a što je ujedno i jedna od osnovnih misija suda. ■

Radni sastanak predsjednika Općinskog suda u Sarajevu i Goraždu

U ime Općinskog suda u Sarajevu sastanku održanom 20.10.2023. godine su prisustvovali predsjednik suda Damir Batotić i zamjenica predsjednika Krivičnog odjeljenja Ajla Papović – Mujan, dok su domaćini sastanka bili predsjednica Općinskog suda u Goraždu Lejla Ferhatović i sudija Muris Tatarin.

Na radnom sastanku je razgovarano u unaprjeđenju saradnje između ove dvije pravosudne institucije.

Razgovarano je o problemima i izazovima sa kojima se svakodnevno predsjednici, ali i nosioci pravosudnih funkcija u ova dva suda susreću. Predsjednici sudova su se upoznali sa aktivnostima koje realizuju, a razgovarano je i o mogućnosti prijenosa pozitivnih



praksi iz jedne u drugu pravosudnu instituciju.

Razmijenjena su iskustva u vezi sa organizacijom i mogućnostima unaprjeđenja rada i upravljanja sudovima, a posebno kada se radi o rješavanju starih predme-

ta koji još uvijek nisu okončani, te mogućnostima za unaprjeđenje rada registra poslovnih subjekata, zemljišnoknjižnog ureda, te bržem i efikasnijem rješavanju krivičnih predmeta. ■

Vijest preuzeta sa pravosudnog portala Općinskog suda u Goraždu Radni sastanak predsjednika Općinskih sudova u Sarajevu i Goraždu (pravosudje.ba)

Godišnji izvještaj o radu sudskih odjeljenja Općinskog suda u Sarajevu tokom 2023. godine

U Općinskom sudu u Sarajevu je na početku 2023. godine bilo 1.086.049 neriješenih predmeta. Tokom godine zaprimljeno je novih 185.093 predmeta te je u radu bilo ukupno 1.271.142 neriješena predmeta. Od tog broja riješeno je 213.112 predmet dok je neriješe-

nih ostalo 1.058.022 predmeta. Bitno je istaći da od ukupnog broja neriješenih predmeta komunalnih je čak 95,80% ili 1.013.881 dok je strukturnih predmeta samo 4,20% ili 44.141 predmet. ■

Parnično odjeljenje (Ostvarena norma 95,18%)

Izvještaj o radu Parničnog odjeljenja za 2023. godinu sadrži podatke o radu odjeljenja sa aspekta broja sudija, predmeta koji su bili u radu u navedenom izvještajnom periodu, realizacije plana rješavanja predmeta, kvaliteta rada i aktivnosti u okviru saradnje Općinskog i Kantonalnog suda u Sarajevu. Početkom 2023. godine došlo je do spajanja Parničnog odjeljenja i Odjeljenja za radne sporove, tako da je tokom 2023. godine na Parničnom odjeljenju radilo ukupno 32 sudija, od kojih je za dvoje prestala sudijska funkcija zbog odlaska u penziju, dok je četvoro sudija imenovano na

Kantonalni sud u Sarajevu, tako da je u prosjeku radilo 26 sudija.

Na početku izvještajnog perioda je na odjeljenju bilo u radu 6.022 predmeta (4.309 „P“ predmeta i 1.713 „Rs“ predmeta) prenesenih iz prethodne godine, zaprimljeno je ukupno 5.471 predmet (4.258 „P“ predmeta i 1.213 „Rs“ predmeta), tako da je Parnično odjeljenje u radu imalo ukupno 11.493 predmeta (8.567 „P“ predmeta i 2.926 „Rs“ predmeta). U toku 2023. godine je riješeno ukupno 5.949 predmeta (4.548 „P“ i 1.401 „Rs“), tako da je na kraju 2023. godine ostalo neriješeno 5.544

(4.019 „P“ predmeta i 1.525 „Rs“ predmeta). Upoređujući navedene rezultate sa 2022. godinom, vidljivo je da su sudije ovog odjeljenja u 2023. godini riješile 2.349 predmeta više.



▲ Azra Hećo, viši referent za upravljanje predmetima

Parnično odjeljenje je u protekloj godini od ukupnog broja riješenih predmeta ostvarilo normu 95,18% te je u odnosu na 2022. godinu, kada je ostvarena norma od 98,51%, vidljivo blago smanjenje ostvarene norme. Na navedeni procenat norme je uticala činjenica da je za dvoje sudija u toku 2023. godine prestala sudijska funkcija, četvero sudija je imenovano na Kantonalni sud u Sarajevu pri čemu su nove sudije imenovane tek u januaru 2024. godine, a jedna sudija je bila odsutna zbog bolovanja duže vrijeme, tako da bi ovi rezultati bili znatno bolji.

Plan rješavanja predmeta u 2023. godini je realizovan u procentu od 89,69% što je u odnosu na 2022. godinu kada je Plan realizovan u procentu od 83,71%, više za 5,98%.

Analiza kvalitete rada pokazuje da je u izvještajnom periodu sa Kantonalnog suda u Sarajevu vraćeno ukupno 1.524 predmeta od čega je potvrđenih ukupno 1.258 odluka, 88 preinačenih, 155 ukinutih i djelimično ukinutih 23, te je procenat ukinutih i djelimično ukinutih odluka u odnosu na ukupan broj vraćenih odluka 10,92%.

Parnično odjeljenje je u toku 2023. godine nastavilo saradnju sa Kantonalnim sudom u Sarajevu u cilju ujednačavanja sudske prakse, na čemu se uspješno radi i na redovnim sjednicama odjeljenja.

Sudije Parničnog odjeljenja planiraju u ovoj godini ostvariti bolje rezultate, s obzirom da je na odjeljenju u 2024. godini raspoređeno 30 sudija, radi čega se očekuju još bolji rezultati.

Porodično odjeljenje

(Ostvarena norma 115,52%)

U 2023. godini na Porodičnom odjeljenju zaprimljeno je 1.032 predmeta. Broj nezavršenih predmeta je iznosio 836 tako da je ukupno u radu bilo 1.868 predmeta. Tokom izvještajnog perioda Odjeljenje je riješilo 1.019 predmeta, dok je neriješenih ostalo ukupno 849. Priliv u 2023. godini je veći u odnosu na 2022. godinu i to za 10 predmeta. Također treba napomenuti da se i u 2023. godini nastavilo sa dodjeljivanjem predmeta sporazumnih razvoda i tužbi bez djece Parničnom odjeljenju.

Norma Odjeljenja u prošloj godini iznosila je **115,52%**. Sudije su posebnu pažnju posvetile i rješavanje najstarijih predmeta te realizacija Plana za 2023. godinu iznosi 87,60%. Značajan podatak u analizi rada jeste i činjenica da je ovo Odjeljenje od ukupnog broja završenih predmeta njih 76,97% završilo meritumom. U pogledu kvalitete bilo je 17,97% ukinutih odluka,

tj. ukupno je vraćeno 89 odluka od kojih je potvrđenih 60, ukinutih 16, djelimično ukinutih i preinačenih 18. Izvještaj o poštivanju optimalnih i predvidivih rokova ukazuje na poštivanje utvrđenih predvidivih rokova tako da dužina trajanja postupka bračnih sporova po tužbi iznosi 240 dana što je ispod utvrđenog predvidivog roka od 581 dana, a što je slučaj i sa izdržavanjem i bračnim sporovima po prijedlogu.

Analizom je utvrđeno da nije bilo opravdanih pritužbi stranaka na rad sudija i izradu odluka u predviđenom roku.

Privredno odjeljenje

(Ostvarena norma 134,39%)

Izvještaj o radu Privrednog odjeljenja za 2023. godinu sadrži podatke o radu Odjeljenja s aspekta broja predmeta koji su bili u radu u navedenom izvještajnom periodu, realizacije Plana rješavanja predmeta i aktivnosti u okviru projekta Unapređenje efikasnosti pravosuđa II.

U periodu 01.01.2023. do 25.09.2023. godine u Privrednom odjeljenju je radilo 10 sudija, a nakon 25.09.2023. do 31.12.2023. godine, zbog odlaska jednog sudije u penziju, na odjeljenju je radilo 9 sudija. Od navedenih 9 sudija krajem 2023. jedna sutkinja je izabrana na sarajevski Kantonalni sud, a jedna je prešla na Parnično odjeljenje, tako da je u toku 2023. godine na odjeljenje došla jedna sutkinja, a početkom 2024. godine na Odjeljenje je došla još jedna sutkinja, te je na početku 2024. godine na Privrednom odjeljenju radilo 9 sudija.

Na početku 2023. godine broj neriješenih predmeta koji su preneseni iz 2022. godine je bio 1.481, a od tog broja je bilo 1.121 Ps predmeta, 184 L predmeta i 176 St, dok je u 2023. godini zaprimljeno ukupno 1.239 predmeta od čega je bilo 967 Ps, 184 L i 88 St predmeta, tako da je u 2023. godini na odjeljenju u radu bilo 2.720 predmeta (2.088 Ps, 368 L i 264 St). U toku godine sudije Privrednog odjeljenja su riješile 1.095 Ps predmeta, 226 L predmeta i 132 St predmeta ili ukupno 1.453 predmeta, tako da je na kraju 2023. godine ostalo neriješeno 993 Ps predmeta, 142 L predmeta i 132 predmeta ili ukupno 1.267 predmeta.

Ukoliko uporedimo rezultate u odnosu na prethodnu godinu, vidljivo je da su sudije ovog odjela u 2023.g riješile 186 predmeta više u odnosu na 2022.godinu, odnosno 12,80%

Analizirajući broj predmeta koji su bili u radu u ovom odjeljenju tokom izvještajnog perioda (2.720) u odnosu na broj predmeta koji su bili u radu u 2022. godini

(3.007), uočava se smanjen priliv predmeta u 2023. godini za 287 predmeta, odnosno 9,54%.

Krivično odjeljenje (Ostvarena norma 110,25%)

U 2023. godini na Krivičnom odjeljenju suda raspoređeno je bilo ukupno 12 sudija, a godišnja norma odjeljenja iznosi 110,25%. Realizacija plana Krivičnog odjeljenja u 2023. godini iznosi 95,23%. Sa drugostepenog suda vraćeno ukupno 674 predmeta. Od toga je potvrđeno 611 predmet, preinačeno 19 predmeta, ukinuto 36, djelimično ukinuto 8 predmeta.

Procenat potvrđenih u odnosu na ukinute i djelimično ukinute iznosi 94,07%, odnosno 5,93% predmeta je ukinuto, a iz čega se može zaključiti da je kvaliteta rada odjeljenja na visokom nivou. Na početku izvještajnog perioda ukupan broj neriješenih predmeta je bio 1.286. Zaprimito je 6.801 predmeta, a tokom izvještajnog perioda je urađeno 6.666 te je na dan 31.12.2023 godine u radu ostalo 1.421 predmeta, iz čega proizilazi da je povećan priliv predmeta. U protekloj godini ovo odjeljenje je uradilo i 767 Pr predmet, a u radu je ostao 101 Pr predmet.

Osim ovih pokazatelja koji evidentno govore o veoma ažurnom i kvalitetnom radu odjeljenja, važno je

napomenuti da je tokom godine troje sudija napustilo odjeljenje zbog imenovanja na nove pravosudne funkcije, a na njihove referate je došlo dvoje novih sudija. Posebna pažnja posvećena je postupku prethodnog saslušanja, odnosno kvalitetu optužnica kao preduslovu efikasnijeg suđenja te donošenja na zakonu zasnovane i pravilne odluke. Navedeno je ishodilo činjenicom da je veći broj optužnica vraćan na uređenje i doradu. Krivično odjeljenje je redovno održavalo sastanke sudija na kojim je definisan proces rada, razmatrana pravna pitanja posebno u pravcu ujednačavanja stavova po istim, praćen protok predmeta, vršena nivelacija radi ravnomjerne raspodjele predmeta sudijama, a sve kako bi se postupci proveli što efikasnije, a odluke bile što kvalitetnije.

Na sastancima odjeljenja raspravljalo se o aktuelnim pitanjima, raspravljalo se o preduzimanju aktivnosti ka efikasnijem i prioritetnijem rješavanju koruptivnih predmeta, pri čemu su sve sudije bile saglasne da uz ostale, zakonom određene prioritete, ulože dodatni napor u borbi protiv korupcije, efikasnijim, bržim i kvalitetnijim procesuiranjem ovih krivičnih djela.

Tokom cijele godine sudije su po rasporedu dežurale u predmetima hitne prirode te su mimo predmeta koji su obuhvaćeni planom, rješavani brojni predmeti kod kojih je hitnost u rješavanju prioritetna (KPP, KV, K i KPS pritvorski predmeti), a nisu obuhvaćeni Planom rješavanja predmeta.



▲ Lejla Išerić i Jasmina Lončarević Tucak, stručne saradnice za izvršenje krivičnih sankcija

Izvršno odjeljenje I-Ip (Ostvarena norma 101,86%)

Programom rada Općinskog suda u Sarajevu za 2023. godinu planirano je da 21 sudija Izvršnog odjeljenja riješi 12.705 predmeta, a u postupcima koji su pokrenuti na osnovu izvršne i vjerodostojne isprave – mjenice, sa godišnjom normom po sudiji od 605 predmeta. Na navedenom Odjeljenju je, zaključno sa 31.12.2022. godine, bilo ukupno 12.325 neriješenih otvorenih predmeta, te je uz godišnji priliv za 2023. godinu od 18.336 predmeta, ukupno u radu u 2023. godini bilo 30.661 otvoren predmet.

U toku izvještajnog perioda, odnosno od 01.01. do 31.12.2023. godine, na Izvršnom odjeljenju je postupao 21 sudija i riješeno je 14.039 predmeta, uz ostvarenu normu Izvršnog odjeljenja od

101,86%, iz čega je vidljivo da nije savladan priliv predmeta u 2023. godini. Na kraju izvještajnog perioda na nivou odjeljenja ostalo je neriješenih


16.622 predmeta, što predstavlja značajnu razliku u odnosu na početak izvještajnog perioda, a na šta je glavni uticaj imao veliki priliv predmeta, kao i

manji broj sudija koji su bili raspoređeni na Izvršnom odjeljenju u odnosu na prethodnu godinu.

U pogledu broja predmeta obuhvaćenih Planom rješavanja starih predmeta za 2023. godinu, kojim je planirano da se riješi 9.282 predmeta, riješeno je 7.724 predmeta, te je navedeni plan za 2023. godinu ostvaren sa procentom od 83,89%, uz procenat riješenosti najstarijih predmeta od 46,23%. Kada je u pitanju kvalitet sudskih odluka Izvršnog odjeljenja, bitno je napomenuti da je kvalitet u 2023. godini bio na visokom nivou, pa tako kvalitet za I predmete iznosi 90,86%, dok za Ip predmete iznosi 93,23%.

Takođe, početkom izvještajnog perioda ponovo je izvršena reorganizacija Službe sudskih izvršitelja, na način da su sudski izvršitelji ponovo raspoređeni po teritorijalnom principu.

Na kraju, i u toku 2023. godine nastavljene su i intenzivirane aktivnosti u okviru Projekta „Unapređenje efikasnosti sudija i odgovornosti sudija i tužilaca u BiH – treća faza“ (Projekat ICEA III), u kojem ovaj sud učestvuje kao jedan od pilot sudova.



Vanparnično odjeljenje (Ostvarena norma 160,41%)

Programom rada Općinskog suda u Sarajevu za 2023. godinu predviđeno da poslove na Vanparničnom odjeljenju obavlja petero sudija i dva stručna saradnika. Međutim, početkom marta mjeseca na odjeljenju je rasformiran jedan „V“ referat, te je 11.12.2023. godine raspoređen još jedan stručni saradnik, tako da je poslove na Vanparničnom odjeljenju tokom 2023. godine obavljalo četvero sudija i tri stručna saradnika, pri čemu su prema funkcionalnoj nadležnosti sudije rješavale vanparnične predmete, sa poslovnom oznakom „V“ i ostavinske predmete oznake „O“ po prijedlozima za raspravljanje naknadno pronađene imovine, kao i raspravljanja zaostavštine u predmetima u kojima je prije stupanja na snagu Zakona o nasljeđivanju F BiH od strane suda doneseno rješenje o nerasprikljanju, dok su stručni saradnici rješavali ostavinske predmete oznake „O“ koji se povjeravaju u rad notarima. Pri tom je važno napomenuti da stručni saradnik raspoređen u odjeljenje 11.12.2023.godine tokom izvještajnog perioda nije dao niti je objektivno mogao dati doprinosa u ostvarivanju rezultata odjeljenja, a što se od istog očekuje u 2024.godini.

Na početku 2023. godine odjeljenje je brojalo 8.446 neriješenih predmeta, zaprimljeno je 8.765 predmeta, tako da je ukupan broj svih predmeta u radu iznosio 17.211. Od toga je u izvještajnom periodu riješeno ukupno 10.021 predmeta i to: vanparničnih poslovne oznake „V“ 2.112 predmeta, ostavinskih sa poslovnom oznakom „O“ 671 predmeta, predmeta oznake „O“ koji su povjereni notarima 7.234 i „ostalih“ 4 tako da je na kraju godine ostalo neriješeno 7.190 predmeta, iz čega proizilazi da su sudije i stručni saradnici ovog odjeljenja **uspjeli savladati priliv i smanjiti zaostatke za 1.256 spisa.**

Analizom pokazatelja iz 2023. godine u odnosu na 2022. godinu, uočava se da je priliv ukupnog broja predmeta bio manji za 466 predmeta te da je u odnosu na 8.446 neriješenih predmeta u 2022. godini ostalo 1.256 manje neriješenih predmeta u 2023. godini. Vanparnično odjeljenje je u protekloj godini od ukupnog broja riješenih predmeta ostvarilo godišnju normu od 160,41% što je u odnosu za 2022. godinu manje za 28,18%, a što je nužna posljedica rasformiranja jednog „V“ referata i preraspodjele predmeta na aktuelne sudije.

Kada je riječ o Planu rješavanja predmeta u 2023. godini isti je realizovan u procentu od 89,29%, od toga najstarijih predmeta u procentu od 70,57%, što u

odnosu na raniju godinu u kojoj je Plan realizovan u procentu od 87,43%, predstavlja povećanje za 1,86%. Pri tom je važno napomenuti da je na početku 2022. godine broj predmeta u Planu iznosio 1.391, a da je na kraju zadanog perioda sa Plana ostalo 149 neriješenih predmeta.

Analiza kvalitete rada pokazuje da je u izvještajnom periodu sa Kantonalnog suda u Sarajevu vraćeno ukupno 23 predmeta, (22 „V“ predmeta i jedan „O“ predmet), tako da procentualna realizacija kvalitete odluka u „V“ predmetima iznosi 79,47%, a u „O“ predmetima 25,00%.

Potrebno je istaći da se na Vanparničnom odjeljenju rješavaju predmeti oznake „V“ koji se odnose na rješavanje ličnih i porodičnih stanja, (zadržavanja duševno bolesnih osoba u zdravstvenoj ustanovi, oduzimanje i vraćanje poslovne sposobnosti, produženja i prestanka roditeljskog staranja i dr.), koji su po svojoj prirodi hitni i koji zahtijevaju postupanje u kratkim rokovima, te maksimalnu angažovanost sudija u radu na istim, kao i predmeti iz oblasti imovinskih prava koji nužno zahtijevaju rad na terenu a što u konačnici utiče i na raspoloživo radno vrijeme i rad sudija na ostalim predmetima.

Na kraju je važno istaći da je na odjeljenju do početka marta 2023. godine bilo raspoređeno pet sudija, a od tog perioda četvoro sudija koji su pored „V“ predmeta cijelu godinu rješavali i „O“ predmete“, da su bile presignacije predmeta izazvane rasformiranjem referata i nivelacijom predmeta te da su na odjeljenju bili veoma učestali izostanci pojedinih sudskih asistenata čiji se posao preraspoređivao na ostale asistente, a uslijed čega odjeljenje nikada nije radilo u punom kapacitetu, što je predstavljalo dodatno opterećenje sudijama i stručnim saradnicima.

Imajući u vidu naprijed navedeno, a cijeneći da je Vanparnično odjeljenje u 2023. godini ostvarilo normu od 160,41%, realizovalo Plan rješavanja starih predmeta u procentu od **89,29%** (od čega najstarijih predmeta 70,57%), to se nameće zaključak da se rad Vanparničnog odjeljenja u 2023. godine može ocijeniti izuzetno uspješnim.

Prekršajno odjeljenje iz nadležnosti inspekcija

(Ostvarena norma 135,35%)

Programom rada Općinskog suda u Sarajevu za 2023. godinu, a radi postizanja boljih rezultata rada, ofor-

mljenja su dva prekršajna odjeljenja i to: Prekršajno odjeljenje opće nadležnosti i Prekršajno odjeljenje iz nadležnosti inspekcija, a predviđeno je da se u prosjeku riješi 858 meritornih predmeta po sudiji. Programom rada Općinskog suda u Sarajevu za 2023. godinu, planirano je da u Prekršajnom odjeljenju opće nadležnosti poslove obavlja 5 sudija.

Prekršajno odjeljenje iz nadležnosti inspekcija postupa u prvom stepenu u svim prekršajnim predmetima u kojima Zahtjeve za pokretanje prekršajnog postupka podnose nadležni inspekcijски organi, kao i po Zahtjevima za sudsko odlučivanje koje podnose okrivljeni na Prekršajne naloge koje izdaju nadležni inspekcijски organi.

Na početku izvještajnog perioda ukupan broj neriješenih predmeta na ovom odjeljenju je bio 4.483 predmeta (od čega 2.602 Pr predmeta a 1.881 Pls predmet), dok je tokom 2023. godine zaprimljen 3.491 predmet (od čega 2.302 Pr i 1.189 Pls predmeta), tako da je u radu bilo ukupno 7.974 predmeta (i to 4.904 Pr i 3.070 Pls predmeta). Riješeno je ukupno 4.705 predmeta (od čega 2.744 Pr i 1.961 Pls, dok je ostalo neriješenih 3.269 predmeta (2.160 Pr i 1.109 Pls predmet) te je ostvarena prosječna norma na odjeljenju 135,35%.

Ako se ima u vidu da je propisana orijentaciona norma na ovom odjeljenju 78 predmeta riješenih u meritumu ili 132 predmeta po ostalim načinima završetka, to ostvarena norma odjeljenja od 135,35% kao i činjenica da je uveliko savladan priliv predmeta svjedoči o velikom zalaganju i posvećenosti radu sudija i njihovih asistenata.

Prekršajno odjeljenje iz nadležnosti inspekcija u navedenom izvještajnom periodu je riješilo 4.705 predmeta i to 2.744 Pr predmeta i 3.971 Pls predmeta što iznosi 35,35% više od predviđenog programa. Pored navedenog, uspjeh ovog odjeljenja ogleda se i u činjenici da je ostvarena izuzetna realizacija Plana rješavanja predmeta u 2023. godini, a koja procentulano iznosi 97,66%.

Važno je istaći da je uredno organizovana 24-satna dežura na prekršajnom referatu te je u gore navedenom izvještajnom periodu zaprimljeno i po hitnom postupku u zakonom ostavljenom roku završen 251 predmet iz oblasti Zakona o zaštiti od nasilja u porodici te je izrečeno 759 zaštitnih mjera iz oblasti Zakona o zaštiti od nasilja u porodici, što je povećanje od 33,46% u odnosu na pretekli izvještajni period.

Sa drugostepenog suda u 2023. godini je vraćeno 126 predmeta po žalbi, od čega je potvrđeno 106, pozitivno preinačeno 9 predmeta, dok je ukinuto 11 predmeta, izraženo u procentima-potvrđenih i pozitivno preinačenih odluka 91,27%, a ukinutih 8,73%, iz čega se može zaključiti da je kvalitet donesenih odluka ovog

prekršajnog odjeljenja u izvještajnom periodu na visokom nivou.

Važno je istaći da na Prekršajnom odjeljenju iz nadležnosti inspekcija nema nezavršenih predmeta u Pr fazi koji su stariji od 5 godina. Najstariji predmeti u radu su u fazi izvršenja prekršajnih sankcija, a ovdje je potrebno istaći da su sve novčane kazne i troškovi prekršajnog postupka u skladu sa Zakonom o prekršajima u FBiH uneseni u registar novčanih kazni te da je sud poduzeo sve radnje radi naplate novčane kazne i troškova.

Izvršenje prekršajnih sankcija se vodi zajedno u oba odjeljenja a u 2023. godini u oba odjeljenja riješeno je 7.594 Ips predmeta, te je po osnovi izrečenih novčanih kazni i troškova prekršajnog postupka naplaćeno ukupno 1.912.983,00 KM, što je povećanje od 19,66% u odnosu na prošlu godinu.

U skladu sa Zakonom o zaštiti i postupanju sa djecom i maloljetnicima u krivičnom postupku 4 sudija prekršajnog odjeljenja iz nadležnosti inspekcija ima uvjerenja i certifikate o stručnoj osposobljenosti za obavljanje poslova iz oblasti prijestupništva mladih i njihove krivično-pravne zaštite, dok je u 2024. godini planirano da se i peti sudija osposobi za obavljanje ovih poslova.

Prekršajno odjeljenje opće nadležnosti

(Ostvarena norma 148,24%)

Prekršajno odjeljenje opće nadležnosti postupa u prekršajnim predmetima u kojima Zahtjeve za pokretanje prekršajnog postupka podnose nadležni policijski organi, kao i po Zahtjevima za sudsko odlučivanje koje podnose okrivljeni na Prekršajne naloge koje izdaju nadležni policijski organi. Programom rada Općinskog suda u Sarajevu za 2023. godinu, planirano je da u Prekršajnom odjeljenju opće nadležnosti poslove obavlja 8 sudija.

Prekršajno odjeljenje opće nadležnosti u navedenom izvještajnom periodu je riješilo 10.278 predmeta i to: 6.307 Pr predmeta i 3.971 Pls predmeta, što iznosi 48,24% više od predviđenog plana. Ako se ima u vidu da je propisana orijentaciona norma u ovom odjeljenju 78 predmeta riješeno u meritumu ili 132 predmeta po ostalim načinima završetka, to ostvarena norma odjeljenja od 148,24%, a koja je veća od prošlogodišnje ko-



▲ Referenti za izvršenje prekršajnih sankcija

ja je iznosila 129,55%, svjedoči o velikom zalaganju i posvećenosti radu sudija i njihovih asistenata. Pored navedenog, uspjeh ovog odjeljenja ogleda se i u činjenici da je ostvarena izuzetna realizacija Plana rješavanja predmeta u 2023. godini, a koja procentualno iznosi 99,72%. Također, sudije su blagovremeno odgovorile i u svim predmetima po Zahtjevima za izricanje zaštitnih mjera zbog nasilja u porodici, na način da je po ovim Zahtjevima odlučeno u skladu sa Zakonom o zaštiti od nasilja u porodici.

Tokom cijele godine sudije su po rasporedu dežurale u predmetima hitne prirode (na ovom odjeljenju sudije dežuraju 24 sata) te su blagovremeno riješeni svi predmeti koji su zahtijevali hitnost u rješavanju. Sudije su prioritarno uzimale u rad i predmete iz oblasti saobraćaja u kojima je prijetila zastara, a koji predmeti se nisu nalazili u Planu rješavanja predmeta za 2023. godinu. U navedenom izvještajnom periodu na oba prekršajna odjeljenja je zaprimljen i po hitnom postupku završen 251 predmet iz oblasti Zakona o zaštiti nasilja u porodici. U zakonom ostavljenom roku je izrečeno 759 zaštitnih mjera iz oblasti Zakona o zaštiti od nasilja u porodici, što je povećanje od 33,46%.

Sudije ovog odjeljenja su i pored obimnih referata kao i svih naprijed navedenih okolnosti ostvarile izuzetne rezultate i u pogledu kvaliteta donesenih odluka. Sa drugostepenog suda vraćeno je 253 predmeta po žalbi, od čega je potvrđeno 199, pozitivno preinačeno 26 predmeta, dok je ukinuto 28 predmeta, izraženo u procentima-potvrđenih i pozitivno preinačenih odluka 88,93%, a ukinutih 11,07%.

Ističemo da na Prekršajnom odjeljenju opće nadležnosti nema nezavršenih predmeta u Pr fazi koji su stariji od 5 godina, već samo predmeti koji se vode u Ips fazi (faza izvršenja) obzirom da je Zakonom o prekršajima FBiH propisano da se novčane kazne i troškovi postupka brišu iz Registra novčanih kazni tek po isteku 5 godina od kada je prekršajni nalog postao konačan i izvršan ili je Rješenje o prekršaju postalo pravomoćno i izvršno. Potrebno je naglasiti da je u 2023. godini na oba odjeljenja riješeno 7.594 Ips predmeta te je po osnovi izrečenih novčanih kazni i troškova prekršajnog postupka naplaćeno ukupno 1.912.983,00 KM što je povećanje od 19,66% u odnosu na prošlu godinu.

Na zahtjev stranaka je izvršena provjera u prekršajnoj evidenciji te je urađeno 4.980 uvjerenja o činjenicama iz prekršajne evidencije i po osnovu izdatih uvjerenja naplaćeno je 72.680,00 KM sudske takse.

Sudije i asistenti na Prekršajnom odjeljenju opće nadležnosti su svojim maksimalnim zalaganjem postigli izuzetne rezultate kako u pogledu norme i kvaliteta, tako i u pogledu poštivanja optimalnih i predviđenih rokova.

Odjeljenje registra za upis poslovnih subjekata

(Ostvarena norma 176%)

Odjeljenje Registra za upis poslovnih subjekata u 2023. godini je zaprimilo 5.585 predmeta što je u odnosu na 2022. Godinu, kada je zaprimljen 5.268 predmeta, više za 317 predmeta. Kada se na broj od 5.585 predmeta doda zaostatak od 644 predmeta proizilazi da je ukupno u radu je bilo 6.229 predmeta.

U 2023. godini riješeno je 5.627 predmeta tako da zaostatak na kraju izvještajnog perioda iznosi 602 neriješen predmet, a što je za 45 predmeta manje u odnosu na početak 2023. godine kada je iznosio 644 predmeta. Ovaj rezultat je postiglo pet sudija uz ukupno ostvarenu normu odjeljenja od 176%.

Rok za postupanje po svim prijavama za osnivanje (urednim i neurednim koje su zaključkom vraćane na uređenje) je sa 14 dana u 2022. godini skraćen na 9,25 dana u 2023. Isto tako skraćen je i postupak trajanja registracije kod Porezne uprave FBiH sa 1,67 na 1,05 dana.

U svim sudovima u FBiH zaprimljeno je 12.909 prijava s tim da je Općinski sud u Sarajevu zaprimio 5.585 prijava, odnosno oko 50% u odnosu na sve ostale sudove u FBiH (deset sudova).

Uspjeh rada ovog Odjeljenja koji se ogleda kroz smanjenja broja zaostataka, skraćivanje trajanja registracije te procenat ostvarene norme sudija, postignut je iz nekoliko razloga:

- Na odjeljenje je raspoređeno pet sudija i jedan stručni saradnik, a što je uticalo da se riješi priliv predmeta i ostvari trend smanjivanja zaostataka.
- Na sastancima Odjeljenja redovno se prati rad svih sudija, a posebno podstiče ujednačavanje prakse u cilju lakšeg postupanja sudija u procesu ocjene zakonitosti priloženih isprava u postupku registracije.

Unapređenje postupka registracije je učinjeno u septembru 2023. godine kada je uveden elektronski upisnik kojim se omogućava strankama praćenje predmeta iz nadležnosti Registra, a što znači da stranka može putem web stranice suda ili QR coda pratiti fazu u kojoj se nalazi postupak. Ovakav način praćenja rada suda po predmetima registracije primjenjuje jedino u Općinskom sudu u Sarajevu. Isto tako na web stranici suda ili putem QR coda objavljen je spisak isprava i dokumentacije koju je potrebno priložiti kod



▲ Mihajlo Bošković, referent u pisarnici Odjeljenja registra za upis poslovnih subjekata

osnivanja kao i svih promjena koje se upisuju u sudski registar. Posebna aktivnost koja se vodi na ovom Odjeljenju odnosi se na proces digitalizacije kompletne arhivske građe sudskog registra. Proces je počeo 01.04.2019. godine, a nastavljen je u prethodnim kao i u 2023. Međutim, isti nije okončan iz razloga što nisu doneseni podzakonski akti čije donošenje proizilazi iz usvojenog Zakona o izmjenama Zakona o registraciji poslovnih subjekata u FBiH (Službene novine FBiH broj: 85/21-stupio na snagu 23.10.2021. g.). Početkom primjene ovog procesa u postupku registracije stvorili bi se uslovi za upotrebu elektronskog potpisa kao i elektronsko pretraživanje i uvid u sva rješenja i isprave registrovanog poslovnog subjekta te lakše i brže izdavanje uvjerenja i izvoda iz sudskog registra. Za ostvarivanje još boljih rezultata rada ovog odjeljenja potrebno je obezbjediti adekvatnu popunjenost sudija i sudskih asistenata čiji nedostatak znatno utiče na dužinu postupka registracije. Navedeno je veoma bitno iz razloga što poslovni subjekti usljed neažurnosti suda mogu imati i zastoj u obavljanju poslovnih aktivnosti.

Zk odjeljenje

(Ostvarena norma 124,27%)

Zemljišnoknjižni ured Općinskog suda u Sarajevu je u 2023. godini zaprimio 32.751 Dn predmet, što **znači da** sa zaostatkom od 1.038 predmeta iz prethodne godine, ukupno je u radu bilo **33.789 Dn** predmeta. Od tog broja urađeno je **33.194** predmeta, tako da je sa 01.01.2024. godine ostalo neurađenih **595 Dn** predmeta. U istom periodu zaprimljeno je **140.821** zahtjeva za izdavanje zemljišnoknjižnih izvodaka, zahtjeva za izdavanje zemljišnoknjižnih izvodaka sa historijatom, raznih zamolnica-obavještenja, uvjerenja, potvrda i sl. i po svim zahtjevima je uglavnom postupljeno (57 neurađen).

Od ukupno 174015 zahtjeva (DN-ova, RZ-ova i Nar-ova) koji su bili u radu tokom 2023. godine, ostalo je neriješenih **595 Dn-ova** i 57 raznih zahtjeva (Rz-ova). Navedeni podaci su potvrda da je Zk odjeljenje Općinskog suda u Sarajevu ponovo poboljšalo stepen ažurnosti po zahtjevima za upis kao i da je skratio rokove izdavanja zk izvodaka i zk izvodaka sa historijatom. Iz priložene tabele, evidentan je kontinuitet povećanja obima posla koji ne proizilazi samo zbog povećanog priliva zemljišnoknjižnih predmeta, nego i zbog povećanja drugih segmenata rada Zemljišnoknjižnog odjeljenja, kao što su zamolnice (koje zahtjevaju istraživanje u zemljišnim knjigama, najčešće za banke – istraživanja o imovini dužnika-neplatiša i dr.), izdavanje istorijata zemljišnoknjižnih uložaka, potvrda o neposjedovanju nekretnina, kao i ogroman broj zahtjeva za zemljišnoknjižnim izvadicima.

U samom tabularnom izvještaju nisu obuhvaćeni predmeti postupka sistematske uspostave i zamjene zemljišne knjige (projekat harmonizacije) koji je u toku, a na osnovu Sporazuma o zajedničkoj implementaciji ovih aktivnosti potpisanog od strane Federalne uprave za geodetske i imovinsko-pravne poslove i Općinskog suda u Sarajevu. Ovim projektom koji finansira Vlada FBiH, a posrednik je Federalne uprave za geodetske i imovinsko-pravne poslove, nastoji se usaglasiti zemljišnoknjižno stanje sa katastrima općina koje su ušle dobrovoljno u ovaj projekat.

U 2023. godini stranke su, prateći praksu uspostave u projektu harmonizacije, nastavile podnositi zahtjeve za pojedinačne uspostave zk uložaka.

U 2023. godini nastavljene su promjene u sistematizaciji radnih mjesta, a koje su u konačnici dovele do bolje ažurnosti u radu na Dn predmetima, kao i u radu sa strankama u šalter sali ovog odjeljenja jer trenutno sa strankama radi 12 uposlenika, tj. 10 referenata u šalter sali Zk odjeljenja koji rade sa fizičkim i pravnim osobama te dva referenta koji rade sa notarima, advokatima.



Tabelarni pregled priliva „Dn“, „Rz“ i „Nar“ predmeta i naplaćene sudske takse u Zemljišnoknjižnom odjeljenju Općinskog suda u Sarajevu za period od 2019. do 2023. godine

Godina	Broj zaprimljenih „Dn“ predmeta	Broj zaprimljenih „Rz i Nar“ predmeta - (ZK izvadci, istorijati ZK uložaka, uvjerenja, zamolnice i sl.)	Iznos naplaćene sudske takse
2019. godina	33.846	132.593	1.568.654
2020. godina	34.613	91.705	1.096.370
2021. godina	32.411	128.760	1.354.758
2022. godina	35.217	126.537	1.410.094
2023. godina	32.756	140.821	1.466.610

Navedene promjene su doprinijele da je Zk odjeljenje adekvatno odgovorilo na povećanje svih zahtjeva stranaka. Zemljišnoknjižni referenti su zbog navedenih promjena manje angažovani na radu sa strankama u šalter sali, pa iako je broj referenata smanjen u odnosu na 2022. godinu, savladan je zaostatak u odnosu na prethodnu godinu.

Posebno naglašavamo da je Zk odjeljenje ovog suda početkom 2023. godine postavilo radne ciljeve, a jedan od glavnih ciljeva je što veća ažurnost u pogledu rješavanja raznih vrsta prijedloga/zahtjeva za upis (zabilježbu, predbilježbu i uknjižbu), kao i ažurnost u pogledu izdavanja zk izvodaka („na licu mjesta“) i zk izvodaka sa historijatom u trajanju do sedam dana od dana podnošenja zahtjeva.

Pokazatelj kvaliteta rada ovog odjeljenja su odluke Kantonalnog suda u Sarajevu, a koji je u period 2023. godine riješio 260 predmeta po žalbama stranaka na rješenja ovog odjeljenja. Od toga broja je potvrdio 220, ukinuo i vratio na ponovni postupak svega 40, a što samo po sebi govori o kvalitetu rada ovog ureda, uz napomenu da je na ukupan broj predmeta 33.789 uloženo svega 226 žalbi na odluke ovog odjeljenja.

Odjeljenje za rješavanje sporova male vrijednosti (Ostvarena norma 124,23%)

Tokom 2023. godine na Odjeljenju za sporove male vrijednosti bilo je raspoređeno 13 stručnih saradnika što je dvostruko manje u odnosu na prethodnu godinu. Bez obzira na manji broj stručnih saradnika, priliv od gotovo 13.000 predmeta je u potpunosti savladan

i smanjen broj neriješenih predmeta iz ranijih godina za gotovo 5% zahvaljući dobroj organizaciji rada na nivou cijelog suda te saradnji sudija i stručnih saradnika. Na kraju godine ostalo je neriješenih oko 77.700 predmeta koje pretežno čine komunalni predmeti (82,89%) dok su ostalo tzv. strukturni Mal i Mals predmeti (17,11%).

Odjeljenje je ostvarilo kolektivnu normu od 124,23% i svi stručni saradnici su prebacili zadatu godišnju normu.

Plan rješavanja predmeta za 2023. godinu ostvaren je sa 93,71% od toga najstariji predmeti iz Plana čine 90,66%, što je do sada najbolji procenata realizacije plana rješavanja predmeta na Odjeljenju. Planom rješavanja predmeta za proteklu godinu bilo je obuhvaćeno 3.566 neriješenih Mal/Mals predmeta, a riješeno je 3.340 predmeta. Ukupan procenat realizacije Plana u odnosu na prethodnu godinu veći je za 1,17%, a realizacije najstarijih predmeta iz plana veći je za 2,65%. Odjeljenje je donijelo 11.078 odluka na koje se može izjaviti pravni lijek. Sa drugostepenog suda je vraćeno 870 odluka po izjavljenim pravnim lijekovima od kojih je: 730 potvrđeno, 58 preinačeno i 82 ukinuto. Iz toga slijedi da je kvalitet Odjeljenja, tj. odnos ukinutih odluka prema ukupnom broju odluka na koje se može izjaviti pravni lijek 99,26%, a prema broju odluka vraćenih sa drugostepenog suda 90,58%.

Svim zaposlenicima su obezbijeđeni adekvatni uslovi i potrebna sredstava za rad. U odnosu na prethodni period, obezbijeđeno je da svaki saradnik ima vlastitu kancelariju i asistenta pa je s tim u vezi povećan i broj održanih ročišta te broj predmeta koji su završeni meritornim odlukama kojih je tokom 2023. godine donešeno 860, što je značajno više nego prethodne godine. Pored ostalog, na Odjeljenju je, uz podršku VSTV-a i Vlade KS, kompletnom audio opremom opremljena velika sudnica koju su tokom godine koristile i sudije ovog suda, a po potrebi je, također, mogu koristiti sudije Kantonalnog suda u Sarajevu.

Na odjeljenju je zaključeno 217 sudskih nagodbi što

pokazuje posvećenost i predanost stručnih saradnika da parničnim strankama predoče prednosti mirnog rješavanja sporova, odnosno da predmete rješavaju efikasno i ekonomično.

Značajno je istaći da su svi stručni saradnici kontinuirano pohađali obavezne edukacije u organizaciji CEST-a te da im je bilo omogućeno prisustvo i drugim vidovima edukacija kako u zemlji tako i u inostranstvu, gdje su uspješno predstavljali i ovaj sud.

Izvršno odjeljenje za rješavanje po vjerodostojnoj ispravi (Ostvarena norma 380,05%)

U Izvršnom odjeljenju po vjerodostojnoj ispravi na Grbavici, kao Odjeljenju specijalizovanom za rad po komunalnim predmetima, u toku 2023. godine posturalo je šest stručnih saradnika.

Na početku izvještajnog perioda na Odjeljenju je bilo 958.606 neriješenih predmeta. U toku 2023. godini zaprimljen je 78.051 predmet te je u radu ukupno bilo 1.036.657 predmeta, a što je u odnosu na 2022. godinu manje za 39.541 predmeta, kada je u radu bilo 1.076.330 predmeta.

U toku 2023. godine riješeno je 82.089 predmeta te se može konstatovati da je priliv savladan i smanjen broj za 4.038 predmeta. Ostvarena godišnja norma odjeljenja je 380,05% pri čemu su svi stručni saradnici ostvarili prebačaj norme.

Posebno treba napomenuti da su stručni saradnici, a u skladu sa Planom rada suda za 2023. godinu, prioritet

u radu davali predmetima sa najstarijim inicijalnim aktom, što pokazuje i činjenica da je u izvještajnom periodu završeno 15.090 predmeta koji su zaprimljeni do 31.12.2007. godine te 11.891 predmeta koji su zaprimljeni u periodu od 01.01.2008 do 31.12.2015. godine, kao i da je na Odjeljenju blagovremeno rješavano po prigovoru i predmeti dostavljani Kantonalnom sudu u Sarajevu po izjavljenoj žalbi.

U vezi naprijed navedenog, Kantonalni sud u Sarajevu je u 2022. godini potvrdio 56 prvostepenih odluka Odjeljenja, pri čemu u izvještajnom periodu nije bilo ni jedne ukinute odluke, što ukazuje na visok kvalitet odluka koje stručni saradnici donose na Izvršnom odjeljenju po vjerodostojnoj ispravi.

Odjel pisarnice na Izvršnom odjeljenju po vjerodostojnoj ispravi je u toku cijele 2023. godine ostvarivao dnevnu ažurnost unošenja pristiglih dostavnica i podnesaka u SOKOP sistem, kao i ažurnost u pripremanju pismena za dostavu izvršenicima, koja se ogleda u štampanju samih pismena i dostavnica koje stručni saradnici kreiraju. Uzimajući u obzir da se radi o velikom broju kreiranih rješenja i zaključaka, jasno je da Odjel pisarnice uveliko doprinosi radu i efikasnosti samog Odjeljenja.

Izvršno odjeljenje po vjerodostojnoj ispravi nastavilo je sa aktivnostima za unapređenje efikasnosti izvršnog postupka, u okviru ICEA III Projekta, gdje je Općinski sud u Sarajevu jedan od pilot sudova za realizaciju navedenog projekta.

U sklopu navedenih projektnih aktivnosti, Izvršno odjeljenje po vjerodostojnoj ispravi je implementiralo niz preporuka i smjernica, koje su doprinijele smanjenju broja otvorenih komunalnih predmeta, što je i bio glavni cilj Odjeljenja za 2023. godinu.

Uposlenici ovog Odjeljenja imaju profesionalan odnos prema radu, te se ulažu maksimalni naponi kako bi se ostvarili što bolji rezultati i kako bi se broj predmeta na Odjeljenju dodatno smanjio. ■



Općinski sud u Sarajevu

Protok predmeta u 2023. godini

Vrsta predmeta	Broj neriješenih predmeta na početku perioda	Broj primljenih predmeta tokom izvještajnog perioda	Ukupan broj svih predmeta u radu	Broj predmeta koji su riješeni u izvještajnom periodu	Broj neriješenih predmeta
	I	II	III = I+II	IV	V = III-IV

Parnično odjeljenje - (26 sudija) - prosjek 213 predmeta po referatu

P	4.309	4.258	8.567	4.548	4.019
Radni	1.713	1.213	2.926	1.401	1.525
Ukupno	6.022	5.471	11.493	5.949	5.544

Porodično odjeljenje - (4 sudija) - prosjek 212 predmeta po referatu

P-Mo	14	38	52	31	21
Porodični	822	994	1.816	988	828
Ukupno	836	1.032	1.868	1.019	849

Privredno odjeljenje - (10 sudija) - prosjek 127 predmeta po referatu

Ps	1.121	967	2.088	1.095	993
L	184	184	368	226	142
St	176	88	264	132	132
Ukupno	1.481	1.239	2.720	1.453	1.267

Krivično odjeljenje - (12 sudija) - prosjek 125 predmeta po referatu

K-K	623	869	1.492	826	666
K-Kpp	86	3.712	3.798	3.696	102
K-Kps	513	1.136	1.649	1.008	641
K-Kv	55	1.666	1.721	1.640	81
K-Mpom	2	2	4	2	2
Km-Km	7	34	41	34	7
Km-Kmv	0	33	33	32	1
Ukupno	1.286	7.452	8.738	7.238	1.500

Pr-Pr	861	8	869	807	62
-------	-----	---	-----	-----	----

IKS	132	331	463	343	120
-----	-----	-----	-----	-----	-----

Izvršno odjeljenje - "I - Ip" - (21 sudija) - prosjek 792 predmeta po referatu

I	6.454	8.173	14.627	8.106	6.521
Ip	1.109	1.331	2.440	1.347	1.093
POM	25	31	56	21	35
I-kom	1.836	334	2.170	1.146	1.024
Ip-kom	151	30	181	96	85
Mal-I-Ip	2.750	8.437	11.187	3.323	7.864
Ukupno	12.325	18.336	30.661	14.039	16.622

Vanparnično odjeljenje - (4 sudija + 2 str. sar.) - prosjek V 217 predmeta po referatu

V	845	2.136	2.981	2.112	869
O	565	449	1.014	671	343
O - notari	7.030	6.177	13.207	7.234	5.973
Ostalo*	6	3	9	4	5
Ukupno	8.446	8.765	17.211	10.021	7.190

Prekršajno odjeljenje opšta nadležnost - (8 sudija) - prosjek 809 po referatu

Pr	5.329	6.778	12.107	6.709	5.398
Pls	2.623	2.704	5.327	4.250	1.077
Ukupno	7.952	9.482	17.434	10.959	6.475

Prekršajno odjeljenje inspekcijski nadzor - (5 sudija) - prosjek 664 po referatu

Pr	2.602	2.488	5.090	2.964	2.126
Pls	1.922	1.298	3.220	2.026	1.194
Ukupno	4.524	3.786	8.310	4.990	3.320

Ukupno Pr	8.792	9.274	18.066	10.485	7.581
Ukupno Pls	4.545	4.002	8.547	6.276	2.271
Ukupno	13.337	13.284	26.621	16.761	9.852

Registar - (5 sudija) - prosjek 126 predmeta po referatu

Registracija poslovnih subjekata	644	5.585	6.229	5.627	602
----------------------------------	-----	-------	-------	-------	-----

Zk referat - (26 referenata) - prosjek 29 predmeta po referatu

ZK predmeti	1.038	32.751	33.789	33.194	595
-------------	-------	--------	--------	--------	-----

Odjeljenje za sporove male vrijednosti - (12 str.sar.) - prosjek 6.494

Mal-kom	59.313	6.989	66.302	10.320	55.982
Mal	10.162	3.036	13.198	4.134	9.064
Mals-kom	8.538	1.027	9.565	1.384	8.181
Mals	3.834	1.747	5.581	879	4.702
POM	4	0	4	0	4
Ukupno	81.851	12.799	94.650	16.717	77.933

Izvršno odjeljenje po vjerodostojnim ispravama (6 str.sar.) prosjek 155.991/ref.

I	915.762	74.299	990.061	97.024	893.037
Ip	42.889	3.749	46.638	3.727	42.911
Ostalo*	0	0	0	0	0
Ukupno	958.651	78.048	1.036.699	100.751	935.948

Ukupno	1.086.049	185.093	1.271.142	213.112	1.058.022
---------------	------------------	----------------	------------------	----------------	------------------


Odjeljenje	Broj predmeta u planu	Broj predmeta riješenih iz plana u zadanom periodu	Ostalo neriješeno iz plana na kraju zadanog perioda	% riješenih iz plana u zadanom periodu
Izvršno	9.283	7.725	1.558	83,22%
Krivično	890	819	71	92,02%
Parnično	6.499	5.829	669	89,69%
Prekršajno	9.234	9.106	128	98,61%
Privredno	1.639	1.501	138	91,58%
Vanparnično	1.391	1.242	149	89,29%
Općinski sud u Sarajevu Total	28.936	26.222	2.713	90,62%

2023. godina

OD UKUPNO 1.058.022 NERJEŠENIH PREDMETA , 1.013.881 ILI 95,80 % ČINE KOMUNALNI PREDMETI, DOK JE 44.141 ILI 4,20 % STRUKTURNIH PREDMETA

44.141	Struktura
-16.622	Izvršni - struktura
-9.852	Prekršaji
-595	ZK
-602	Registar
-120	Iks-referat
16.350	1,55% - parnica i krivica

Struktura neriješenih predmeta na dan 31.12.2023. godine



2022. godina

OD UKUPNO 1.086.049 NERJEŠENIH PREDMETA , 1.040.502 ILI 95,80 % ČINE KOMUNALNI PREDMETI, DOK JE 45.547 ILI 4,20 % STRUKTURNIH PREDMETA

45.547	Struktura
-12.325	Izvršni - struktura
-13.337	Prekršaji
-1.038	ZK
-644	Registar
-132	Iks-referat
17.279	1,59% - parnica i krivica

Općinski sud u Sarajevu

